

ہاڈ کے پھل  
نعم حسین سید

سن ۷۸ء دے ہور داک " مزدور علاقہ " ایتھے اک مزدور پارٹی ولوں کلچرل

پرگرام " ہون والا اے -

رات دا ویلا اے - اک چنکرہ تھڑا اے - تھڑے دے ساہمنے تے

بجے کھلا پڑا اے - پڑوچ دریاں وچھیاں نیں - تھڑے دے پھلے

بنے کناں لگی ہوئی اے - کناں دے کھے سرے بوہا رکھیا گیا اے

کاغذی جھنڈیاں نال سجایا ہویا - کناں اُتے لال کپڑے دے دو

بیزنگے ہوئے نیں - جینہاں اُتے چٹے رنگ دے نعرے لکھے

ہوئے نیں - " دنیا بھر کے مزدور۔۔۔۔۔۔۔ ہو جاؤ "

"۔۔۔۔۔۔۔ کاراستہ ہمارا راستہ "

بیزاں وچ وٹاں پاروں دو لفظ پڑھے نہیں جاندے

سواہر ناتا چاننا - کجھ بال جنانیاں جنے - ویکھنہاراں والے پاسیوں پڑ

وچ آن بہندے نیں پئے - ایہہ کھیڈ دے ویکھنہاروی ہن - تے کھیڈ دا اک

پاتروی - ایہہ پاتر پڑوچ کدی چاننے کدیس انہیرے رہندا اے - چاننے ایس

پاتر دے کیس رنگ نیں - کدیں چُپ بیٹھا سندا اے - کدیں کھل کے کھیڈوچ  
دل ویندا اے - انہیرے ہونڈیاں وی ایہدا اک رنگ اے - کالا - ادھ گجھا  
پر ات گوڑھا۔

پڑ مٹناک بھر گیا اے - دو پنچھیاں ترہیاں دے جنے دتا تے راجو عوامی  
سوٹ پانی تھڑے اتے نک ٹھیک کر دے ویلے ہوئے نیں - پڑ انہیرے ہو گیا  
اے تھڑا چاننے - [

راجو - فس کلاس بند و بست ہو گیا تے یار۔

دتا — چلو جو وی ہو گیا تے۔

راجو - ہن عاشق لے آوے سہی آرٹھاں نوں۔

دتا - کلا ای مڑ پتے تاں وی بڑی گل اے۔

راجو - کسے کسے ویلے مینوں تیرے تے بے وساہی ہو جاندا اے - ایہو  
جھیاں گلاں سُن کے۔

دتا - تہاڈیاں بے وساہیاں صدقہ رہیا کھیا ست وی گوالواں گے۔

راجو - ست گواناٹے تسیں آپنیاں کیتیاں نال - سانوں ورت لینا اُلاہمیاں لئی۔

دتا - جے کیتیاں دی ونڈ دا ویلا آگیا تے پھیر ہر کسے دیاں آپو اپنے نال۔

راجو - میں نہ کدیں کسے دی کیتی اپنے ناویں لوائی اے نہ اپنی کسے دے مٹھے

مڑھی اے - لاہ پچاہ کرن تے آجاندا تے - کیہہ آکھیا تے میں - ایہو بی

اینے چر دے جوں شاعراں تے گاؤن والیاں دے ناں لکھ لکھ کے

ڈھیر لاوندے رہے او - تے ہن ایس ویلے آہناں کلا ای مڑ پوے۔

دتا - چوکھا کجھ ہووے پر گکھ وی نہ ہووے - ایہہ بہار اے ساڈے تے۔

ایس بہارے ڈھیر سارا بُر پنیدا تے - پر پھل نہیں بندا - پھل کے بھڑ

جاندائے۔

راجو۔ اک تے شاعریاں لے کے بہہ گئیاں نیں تہاڈیاں۔ رانج دیاں گلاں کر کے

شیرے وچ پالیندائے بندہ آپنے آپ نوں۔

[عاشق آوندائے۔ عمروں راجو تے دتے دا لانی اے۔ گل رتا

پچکاسو۔]

دتا۔ کتھے نی بی اوہ۔ کون کون آوسیا۔

عاشق۔ آکھ تے ساریاں نوں آیاں۔ آؤنا کسے نہیں۔ وچوں ڈردے نیں لیوی

نہ لہہ ونجے اتوں بھاراں تے پوندے نیں۔ کاغذ دیاں پراں والے۔

دتا۔ تے سن پھیر کرنا کیہہ جے۔ لوہے دیاں پراں والیو۔

عاشق۔ کجھ کراں ای نا۔ آپنا دم تے ہے ای۔

راجو۔ اوہ خیر ہووے۔ رتا پچکا جو آگیاے۔ ایو بڑائے۔

دتا۔ آپ تے ہے آں۔ اوہ گل نہیں۔ میں تے فاروق تے مجلسِ عاملہ دی

پیا سوچداساں۔

راجو۔ تیرے سرتے ہر ویلے اوہو سوار رہندے نیں۔

دتا۔ اسیں بنے جوں سواری جوگے ہوئے۔

راجو۔ پھیر شیرا۔ جدتائیں گلاں دا شیرا نہیں مکدا۔ ساتھوں لکھ نہیں ہونا۔

دتا۔ تے جتھے گلاں سکیاں نیں۔ کڑا کڑ بولدیاں تے عملاں چوں شیرا چو چو

پنیداے۔ اوتھے ؟

عاشق۔ جے میں پنج سوگوئیے تے ساڈھے پنج سو شاعر گھیر لیا وندا تاں وی

فاروق کیاں اوہو کرنی ہی جیہڑی ہن کرنی نیں۔ (ہس کے) پنج راہ

ج بھولا بھنڈا ٹکڑا گیا۔ اکھے ویاہ چلیا میں۔ مئے جلسہ اے یار۔ اکھے

اسیں وی آجائے - آجاءِ مخے میں سوچناں جدوں آ دھاتے آگئی  
گل۔ سچھی مچی لے آونٹے میں اوہناں نوں۔ مٹر جٹ جائے تے، بچو جانے۔  
وتا۔ بوٹے پیٹے تاں جے آگول لاون جوگا کجھ ہتھ وچ ہووے۔  
عاشق۔ ایہہ بوٹے نہیں امر ویل نہیں۔

وتا۔ تے اسیں کیہ آں۔ ساڈے پلے کیہہ اے۔

راجو۔ شیرا۔ اسیں شیرے دیاں مچھیاں۔

وتا۔ چیہڑا ماواں ساڈیاں نہیں جمدیاں مونہاں وچ چویا۔

عاشق۔ ماواں کیہہ کر دیاں وچاریاں۔ چیہڑا شیرا اوہناں کولوں ساڈے پیو

نہ لے سکے اوہناں پتراں دے تالواں تے ای لبنا ہاکے۔

وتا۔ پیو کیہہ کر دے وچارے۔ بھکھ دی غلامی نے اوہناں دیاں کھلاں

وچ زمیش ای نہیں سی چھڈی۔

راجو۔ اوہ کیہہ کر دے وچارے اوہ کیہہ کر دیاں وچاریاں۔ اسیں کیہہ کرئیے

وچارے۔

لڑے کیوں نہ۔ لڑدے۔ مر جانڈے لڑکے۔ (کھلیرا) خبرے کیہڑیاں جگاں

دے کیرنے پھولن بہہ جانڈے نیں۔ اگلی نہیں سوچدے۔

[باہروں درلے درلے نعریاں دا واج آوندا اے۔ جد و جہد۔

جد و جہد۔ بند کرو۔ بند کرو۔ . . . . ہمارا راستہ۔ ہمارا

راستہ . . . . . واپس لو واپس لو۔]

عاشق۔ چلو دیو سلامیاں اگے ہوکے۔

[وتا نکروں کپڑے دے جھولے وچوں گٹے دے ہار کڈھ کے راجو

تے عاشق نوں اک اک پھڑاوندائے۔ اک آپ پھڑ لیندا اے۔

نعرباں والی ٹولی کنات والے بوہیوں ڈھکدی اے۔ تھڑیوں محنت  
 کش اتحاد۔ زندہ باد۔ قائد انقلاب محمد فاروق خاں۔ زندہ باد۔ دے  
 نعرے لاوندی پڑوچ لہہ کے کھلو جانڈی اے۔ پڑا دھ چانٹنے آگیا اے  
 پورا اکٹھ کھلو گیا اے۔ تے نعرباں وچ رل گیا اے۔ فاروق ہاں  
 لہ یا اندر وڑا اے۔ آے دو اے کجھ تگڑے جھنے اوہدے نال  
 جڑے ہوئے نیں۔ دتا عاشق راجو فاروق نوں ہار پواندے نیں  
 پواندے کیہہ نیں۔ اگلیاں ہاراں تے ہار دھر دیندے نیں فاروق  
 ہاراں توں اتیرے باہواں چا کے نعرے وصولدا اے۔ تگڑے  
 جھنے اگیرے ہو کے خلقت نوں بہن دیاں سینتاں مریندے نیں  
 فاروق تے اوہدے نال دے خلقت موہرے پڑوچ بہہ جانڈے  
 نیں۔ عاشق دتا تے راجو دی۔ خلقت دے بہندیاں دتا تھڑے  
 تے چڑھدا اے۔ ]

دتا۔ ساتھیو۔ میں ثقافتی کمیٹی ولوں تہا نوں ساریاں نوں مجلس عالمہ دیاں ممبراں  
 نوں تے اپنے صدر ساتھی محمد فاروق خاں صاحب نوں جی آئیاں اکھناں  
 ثقافتی کمیٹی نے اجدے اکٹھ لئی محنت کشاں نال ہمدردی رکھن والے  
 ملک دے منے پروئے دانشوراں فنکاراں اتے شاعران نوں سداتا  
 ہو یا تے۔ ہو سکدائے ادہناں وچوں کجھ اپنیاں رُجھاں پاروں ویلے  
 سر نہ اڑ سکن۔ ویلا ہو گیا تے۔ میں صدر صاحب دی اجازت نال ساتھی  
 عاشق ہوراں نوں درخواست کرناں اوہ اجدا پروگرام شروع کرن۔  
 [دتا تھڑیوں لہندا اے۔ عاشق چڑھدا اے۔ کھلو کے گل کرن لگا  
 ای اے تے باہروں ڈھو لکڑی نال کجھ پاٹیاں واجاں دا گاون

رولا اندر آوند اے - بھولا بھنڈتے اوہدے دو بھرا میلیاں دھتیاں  
 اُتے میلے جھگے پائی اندر آوندے نیں - پنچیاں پنتیاں دے گیر وچ  
 نیں - بھولے دے ہتھ ولیتی دودھ دے سکھنے ڈبے دی ڈھوکی  
 اے - ۲ دے ہتھ پٹاس اے - ۳ تا وڑی پیا مریدا اے - ترلیے  
 تھرے تے کھلو کے گاوندے نیں - عاشق پہلوں گھاہر کے  
 بھنڈاں نوں ٹھاکن دی کردا اے مڑا چنبھے وئی مُسکار نال کھلوتا  
 رہ جاندا اے - تے اوڑک لبہ کے پڑ وچ بہہ جاندا اے - [

بھولے ہوویں (سہرے دے سُروچ)

مُسکھاں نال آئی سانوں اجدی رات اے  
 بھاگاں نال آئی سانوں اجدی رات اے  
 اے نی اجدی رات برات اے  
 جو مونہوں منگیے ملے  
 بھینا رات کیہہ اے شبرات اے  
 جو مونہوں منگیے ملے -

[ تھوڑا چرگوں کے بھولا "ڈھوکی" ہاراں دے ڈھیر کول دھر

دیندا اے - ]

بھولا - بُرر اللہ دی امان -

۲ - دوارے و سدے رہن -

بھولا - ایہہ کتھے اوڑے آل سئی - پتہ تے گلت نہیں -

۲ - پتہ تے ٹھیک اے تیں ب رنگ او خیر نال - لوٹکٹ لوالو - (پٹاس

بھولا - میں اے دی آہناں مڑ چل -

۲ - کیوں -

بھولا - نہ دیگیاں دا کھڑکار - نہ پلا دی ہواڑ - ایہہ برہمی والیاں دا دفتر نہ ہوسے  
کیتے -

۲ - مریں ( پٹاس ) تے ایہہ جہڑے بیٹھے نہیں ایہہ کون نہیں -

بھولا - مینوں تے آپنے بھرا ای لگدے نہیں -

۲ - مریں ( پٹاس ) ابے تہاڈے نوں عربیاں ٹھیکا دتا ہونا تے نا بھنڈ  
پلانی دا -

بھولا - میں ابے دی آہناں مُرچل -

۲ - کیوں -

بھولا - ( بھیت نال ) ایہہ کوئی شک والی تھاں اے -

۲ - ( کن کریندیاں ) ہیں !

بھولا - ( بھیت نال خالی گٹ توں ” گھڑی “ دکھا کے ) پورے پنچ منٹ ہو

گئے نی جگتاں کردیاں ایہناں نوں ہا سا ای نہیں آوندا -

۲ - مریں ( پٹاس ) وجہ دیکھو آپنی خیر نال - تہانوں دیکھ کے رووے

کوئی کے ہستے - ہاں جی - میں کہیا ایتھے اج جلسہ سی مجور بھراواں دا -

بھولا - اوہ نہیں ہوسکیا -

۲ - کیوں ؟

بھولا - ہڑتال ہوگئی اے -

۲ - بجو اس نہ کراوئے - اجکل کیہڑی بہار اے ہڑتال دی - ہزاراں پج دن

ستونا سودا اے - مجور بھرا دئے سکھ نال دیہاڑی تے جانڈے نہیں -

شامیں بال بچے نال ٹیلی ویژن دیکھدے نہیں - جمعے والے دن نہا دھوکے



اللہ دے حضور وچ پیش ہو جان دے نیں -  
بھولا - نہیں قسمے میں پتہ جو کیتا ئے ہڑتال اے -

۲ - پرکاہدی اوئے -

بھولا - بھنڈ آگئے سن مالکماں ویلاں نہیں سینکشن کیتیاں -

۲ - مریں (پٹاس) لے پھڑ بونس -

[اگانہ ہو کے جھٹ کھلو کے دیکھدا اے - مڑتہمت لتاں وچوں

چھک کے چچھے ٹینگ کے پتلون بنا لیندا اے - سینت دی

سوٹی کچھے مار کے "پتلون" دے کھیاں وچ ہتھ پا کے کھلو

جاندا اے - ]

۳ - خبردار اوئے - کوئی نہ ہتے - جام ہو جاؤ جتھے او -

[بھولا، ۲ اٹنشن ہو جان دے نیں مڑ آپے ای سٹینڈ ایٹ ایز - ]

۳ - نہیں اوئے - اٹنشن ! (بھولا، ۲ مڑ اٹنشن) تہانوں پتہ اے ایہہ

کیہہ تھاں اے ؟

بھولا - (کنبدیاں) پتہ ہوندا تے تہا ڈے متھے کیوں لگدے بڑا واساب -

۳ - (سینت دی سوٹی مریندا تے) بکواس نہ کر اوئے - باشٹر - ڈیم فول -

ایہہ مجوراں دا جلسہ اے - کوئی مخول نہیں - ایتھے کسے نوں اجازت

نہیں وادھو گل کرن دی -

۲ - تے سرکار میری اسیں کوئی سیاسی تقریر تے نہیں کیتی جگتاں ای کرنے

آں پئے -

بھولا - تسیں تلاشی لے لو سر جی - کوڈی ویل دی بکل آدے تے جمع کرا دیاں

گے رسیدوں بغیر ای اللہ دی امان -

- ۳ - دونہاں نول ویہہ ویہہ سال قید - نموش !
- ۲ - تھوڑی بہت رعایت -
- ۳ - اک نول دس کوڑے اک نول پنج کوڑے ، نموش ! ( سوچ کے ) تہاٹے  
چوں کوڑے کیہنوں مارنے آوندے نیں اونے -
- ۲ - دونہاں نول سرکار میری - اسیں خاندانی جلا د ہوندے جے - بھنڈتے  
ایویں پارٹ ٹائم ہوئے کے -
- ۳ - بس ٹھیک اے - ویری گڈ - توں ایہنوں کوڑے مار ایہہ تینوں مارے -  
قوم کو تم پر فخر ہے -

[ ۳ ] اگے ودھ کے ۲ نال ہتھ ملا دندا اے - جیویں انعام یاں  
سند دین لگیاں ملا دندے نیں - بھولا ہتھ دا کیمرہ بنا کے پریں  
فوٹو گرافراں والے پنیترے نال دو تن واری فوٹو لیندا اے -  
۲، ۳ دا ہتھ پھڑی کیمرے ول ویکھ کے فوٹو لہا دندا اے - مُرٹ ۲  
پچھے ہٹ کے سلوٹ مریندا اے - مُرٹ پاس دا کوڑا بنا کے  
چھنڈ دا اے - مُرٹ کوڑے نول کُرتے ہیٹھ لکا کے اک دم انڈا ہو  
جاندا اے تے ہولی ہولی نسدا بھولے تے ۳ دوالے چکر لاون  
لگ پیندا اے - ]

- ۲ - کوئلہ چھپاکی جمبرات آئی جے - کے مُنڈے کڑی دی برات آئی جے - گھر  
مٹھے چولاں دی پرات آئی جے - جیہڑا پچھے دیکھے اوہدی موت آئی جے -  
[ ۲ ] - دے چکر لاؤندیاں بھولا تے ہولی ہولی بہہ جاندا اے نیں جیویں  
کھیڈ و تھ سچ رلے بال ہون - اکھاں نوٹ لیندے نیں تے وارو  
واری کنڈ پچھے ہتھ مریندے نیں - ۲ کوڑا مُسٹن دا جھکا دیندا اہر

سڈا نہیں۔ کچھ چکراں مگروں ۱۳ بھڑوا ہے اکھاں کھول کے کھلو

جاندا اے۔ ]

۳۔ اوئے! اوئے!!

[۲] ”کوٹلہ چھپا کے“ کردا مشین وانگر چکر لائی آوندا اے۔ چکر

تیز ہوئی جاندا اے نیں۔ اوہدیاں اکھاں ادھ نوٹیاں نیں بل اپنے

آپ پتے ہلدے نیں۔ مونہہ تے اک عجیب جہا بے وسا جوش

اے۔ جہڑا حال کھیڈن والیاں دے مونہہ تے ہوندا اے۔ ]

۳۔ (بھولے نول) اس کورو کو۔

بھولا۔ ایہہ نہیں رُک سکا۔

۳۔ کیوں۔

بھولا۔ ایہدے پچھے کوئی غیبی ہتھ اے۔

۳۔ (مونہہ وچ انگلاں دے کے سیٹی مریندا اے۔ ۲ کھلو جاندا اے۔)

ایہہ کیہہ کھنڈ بازی اے۔ (بھولے نول ٹھڈے نال اٹھا وندا اے)

اٹھ اوٹے۔ توں وی وچے ای ایں۔ تم کو پتہ ہے یہ عدالت ہے۔ تم کو

توہین عدالت کی سزا.....

۲۔ (بھولے نول بچھ مار کے) رحم دی اپیل کراوٹے۔

۳۔ ہتھ تے کیوں بولنا میں اوٹے۔ پہلوں سزا سن۔ تہا نول کیہہ پتہ میں سزا

دینی وی اے کے نہیں۔ ہو سکا اے میں تہا ڈا ای فائدہ سوچیا ہوئے۔

بھولا۔ سزا سزاؤ سرکار تیں۔ ایہہ تے ایویں بیوقوف ہے۔ ایہنوں عدالتی

کاروبار دا تجربہ نہیں نا۔

۳۔ کوڑے! تا برخواست عدالت۔ (چونکڑا مار کے بہہ جاندا اے)

۲ - اونے ہونے - اوے ہونے -

بھولا - حال اونے -

[ ۲ کنبد کنبد ۳ دے مگر جا کے مکرے اوہدے کھیسے نوں ہتھ

پاؤندا اے ۳ اوہنوں نپ لیندا اے - ]

۳ - ایہہ کیہہ کرن لگا سیں -

۲ - او سرکار ذرا ڈبی سکٹاں دی دے دیو وصیت لکھنی سی -

۳ - خبردار اونے - ایڈی وڈی عدالتوں سزائے کے آپنی اوقات جھل گئے

او - ہوناسی کلاس مانگت تے کرنیاں وصیتاں - اوہ وی لکھ کے -

مُونہ زبانی بول جو بکنا می -

۲ - (رُون ہا کا) میں گل عالم دیاں بھنڈاں نوں وصیت کرناں پئی مجوراں دیاں

جلسیاں ترح نقلاں کرنیاں ہون تے ویلاں گھروں نلے کے آیا کرو -

بھولا - نہیں سرکار میری - ایہہ وصیت ای گلت ہوئی اے - گھراہدے اتے

نے نوٹ چھاپن والی مشین لائی ہوئی اے ؟ میں درخواست پیش کرناں

وصیت ایہور ہوے - پرتسیں ایہدے وچ اپنے ہتھ نال اک

ترمیم کر دیو -

۳ - بول - ( لکھن دا پنیترا )

بھولا - بس جی ایہو سئی ویلاں جمعرات دے جمعرات درباروں کٹھیاں کر لیاں

تے جلسے توں اک دن اگوں ججناں نوں ایڈوانس پھرا دتیاں - ( اکدم

گوڈے پھڑکے ) باقی سرکار رحم کر دیو تہاڈے مانگت آں - نکا نکا

بال بچہ اے -

۳ - بس اونے - اپیل دا ویلا تیں وصیت وچ گوا دتائے - خاندانی جلا دو -

تم کو حکم دیا جاتا ہے کہ قنون کے مطابق آپ اپنا فرض پورا کرو۔ اس وقت قوم کی آنکھیں تم پر لگی ہوئی ہیں۔

۲- (نیوں کے) حضور - (بھولے نال) چل سہی تیری سہی۔

[بھولے نون ہمتہ اتا نہہ تے لتاں چوڑیاں کرا کے "کرٹکی" وچ کھلیار دا اے۔ اوہنوں ٹوٹی لاوندائے۔ اوہدی نبض ویکھدا اے۔ ڈنڈ بیٹھکاں مارداے۔ ڈولے ویکھداے۔ تہمت ٹنگداے۔ پنخ کے بلی مارداے۔ مڑ قدم گن کے بھنجے نشان رکھدا اے۔ جیویں فاسٹ باولر ہووے۔ باولراں وانگر پنڈا نسل کر دا مڑ پٹاس دا کوڑا تولدا اے تے "شارٹ" لیندا اے۔]

۳- پہلے پیوکانام بولو۔ تاکہ ملزم کی شناخت ہو سکے اور ساتھ ہی ساتھ والدین کچھ عبرت بھی پکڑیں۔

بھولا۔ "کرٹکی" وچوں (حضور ایس بھنڈ لوک ویلے سر کھوتے نون پیوہنا لینے آں۔ ایس ویلے تے تیسیں امی مائی باپ او۔

۳- خموش!

[ستراں بہتراں دا گلابو۔ چھیک پینڈا۔ چٹے پٹے۔ چٹیاں لمکنیاں مچھاں گل میلا پھکا۔ ویکھنہاراں دلوں بالاں والی پھرتی نال تھڑے تے چڑھدا اے۔]

گلابو (کوک کے) گلابو، مائی باپ میرا ناں گلابو جے۔ میں پیو آں ایہناں دہناں داوی تے تہا داوی۔

(تریوے اکھڑ جانڈے نیں)

۳ او بیڑا گرک جائے۔

۲ - توں جندا نہیں نہ ماریا ہونا -

بھولا - بے بے کدھر گئی ؟

گلابو - مائی باپ میں ایس دھرتی دا سبھ توں پرانا بھنڈاں -

بھولا - (سنبھل کے) ایتھے آپنا ختم دو ان آئے و -

۲ - امپلائمنٹ اسپینج واکاڈ ہے ای -

گلابو - مائی باپ ایہہ بھنڈاں نیں - پیونال وی جگت کرنوں نہیں طمن لگے -

بھاویں کوئی کم دی گل اوہڑے نہ اوہڑے - میرا ناں گلابو اے -

ایس دھرتی دی اٹ اٹ تے میری پٹاس دا نشان اے -

بھولا - انکل - توں بھنڈاں دا بزرگ ایں تے بزرگاں دا بھنڈاں ایں - تیریاں

جھاناں دا جمعرات ولیمہ ای میانی صاحب - او تھے جا کے مار اٹاں

تے پٹاس -

۲ - آہو خیر ہووی - ایتھے انگلش میڈیم اے -

گلابو - (۳ نال) سرکار تیں ایہناں نوں کوڑے مرواؤنے سن -

۳ - ہین نہیں وج سکدے -

گلابو - اوہ کیوں ؟

۳ - ایہہ وعدہ معاف ہو گئے نیں -

گلابو - پھیر ایہہ پٹاس مینوں چا دیو -

۳ - جاے نہیں بل سکدی -

گلابو - اوہ کیوں -

۳ - اجے اصل ملزم مفرور اے -

گلابو - حضور جے میں ملزم پھڑوا دیاں تے مینوں ملیسی کیہہ -

۳ - پھانسی -

گلابو - اللہ دی امان اوہ کیوں -

۳ - وعدہ مافاں دیاں وکنسیاں پوریاں ہو چکیاں نیں - نالے توں اوور ایج ایں -

گلابو - تے ایہہ جواناں دا ای کم اے -

۳ - (بھولے نال) ٹھوہ ٹھاہ ٹر پٹر!

بھولا - (سلوٹ) سر!

۳ - با - بے ہوراں نوں با - عزت بری کیتا جاندا ٹے - ایہناں نوں با - <sup>ظہت</sup>حفا

گھر چھڈ کے آؤ -

۲ - تے بے - بے ہوراں کو لوں رسید لے کے آؤ -

گلابو - مینوں اپیل دا حق اے -

۲ - وکیل عزرائیل نوں کرنا جے -

گلابو - سرکار ایہناں دے برخلاف کارروائی کیتی جاوے - ایہناں کو لوں محکمت

نیں بندی - ایہہ آجا کے میرے بڈھیپے توں ای فائدہ اٹھان دی کوشش

کر دے نیں -

۳ - اپیل خارج - ملک دے بہترین مفاد واسطے کسے وی چیز توں فائدہ

اٹھایا جاسکدا ٹے -

بھولا - (گلابو نوں باہوں پھڑکے) آہو تیرا بڈھیپا کوئی پرائیویٹ اے - چل

(اوہنتوں کھچدا اے)

گلابو - (آرڈیاں ٹر دیاں) بڈھیاں تے تیں وی ہونا ٹے حرام دیو -

بھولا - او سے ساڈے سینس کینل کرا دئیں -

[بھولا گلابو نوں چھکدا تھڑویں ڈھلن لگا اے - مہراں، ٹگڑی کاٹھی دی

جانی ، دیکھنہاراں ولوں اگے آندی اے - آپنی کایا پاروں گلابو  
 کولوں چوکھی نکئی جا پدی اے - کر ڈر ڈرے سر سنے وی -  
 مہراں - لکھ لعنت ای ستیں پیڑھیں ہگا ونیا - میں گوانڈھیاں دے ڈہنی تیلی  
 لین گئی آں تے مگروں ٹھٹ کے ایتھے آن چڑھیا تے -  
 قصائیاں جوگا - خورے راہ کیہنے دسیا سو - چھڈ دیوس بھولیا میں لے  
 جانی آں - تیس کر دکم - ( گلابونوں بانہوں پھر دی اے ) ہن تے  
 ایہدا پر دہ ای ہو جائے - تاں ای کھلاسی ہونی اے ساڈی -  
 گلابو - ( بانہواں چار کے ) میں پرھے کولوں نیاں سنگناں - مینوں قبر پئی چھکدی  
 اے - جاناتاں مینوں پینا ای اے - جان توں پہلاں مینوں ڈھائی گھڑیاں  
 دے دتیاں جان -  
 ( کجھ ہاسا - کجھ رولا )

واجاب -

بابا جی جان دیو -

ٹھیک اے بڑھڑیا

دومنٹ بولن دیوس یار

بزرگو ٹیم نہ خراب کرو

( اک جنا اٹھ کے گلابونوں ویل دیندا اے )

گلابو - ویل ویل گلابو بھنڈ دی ویل بھنڈاں دے پورس دی ویل -

بھولا - ( ۳ نال ) حضور اینے اپنے ناں دی ویل ہوک کے بھنڈاں دادستور

تروڑیا جے -

۳ - چپ اونے بھنڈاں دے دستورنوں تے خیراں نیں - اونہوں کون مائی



دالال تروڑ سکدائے۔ ہاں ایس ویلے نظریہ ضرورت دے تحت اوہلے  
تے عمل روک دتا گیا تے۔

(اک ہور جٹا گلابو نوں ویل دیندا اے)

گلابو۔ ویل ویل ست پیڑھیے بھنڈ دی ویل۔ ڈھڈ گھر وڑی دی ویل۔ جواناں  
دی کھار دی ویل۔ سچ والیا توں ویل ودھائیں تے لیکھے لائیں۔  
مہراں۔ ارانہہ کر کدھرے سٹ نہ پائیں۔

(گلابو اپنے سروں وار کے ویلاں مہراں نوں پھڑا دیندا اے)

۲۔ بلے او بے بے توں تے ساڈی وی پیو ایس۔

گلابو۔ (مہراں دی ٹھوڈی ہتھ لاکے) ہُن جان بخشی کرو۔ چودھری ساب۔  
دیہاڑی بن گئی اے تہاڈی۔ ہور ٹھانے کھڑکے بھنڈ چوں کیہہ لینا  
جے (خلقت نال) پرھے والیو اسیں بھنڈ لوک گلاں دا امی کھٹیا کھانے  
آں۔ لیکھاں دا لکھیا نہیں لیندے۔ پر آج میں ویل نہیں سی منگی۔ نیاں  
منگیا ہا۔ میں تہا تھوں پھپھنا ہا سئی بھنڈ کون ہوندا اے۔

بھولا۔ جیہڑا شوماں کولوں ویل لے لوے۔

گلابو۔ (لوکاں نال) کیوں جی بھنڈ داکم ویل لیندے؟

بھولا۔ نہیں۔ کاہنوں۔ (دعظ والی ہیک نال) بھنڈ داکم اے فجرے  
صدقے دیاں سریاں کٹھیاں کرنیاں۔

۲۔ (اوسے ہیک نال) پیشی ویلے کمیٹی دا پانی پینا۔

۳۔ (اوسے ہیک نال) کفتاں ویلے کورا لٹھا لین میانی کلاتھ مار کیٹ جانا۔

گلابو۔ جے بھنڈ داکم ویل لیندے تے مِر ٹھیک اے۔ ایو بھنڈ نہیں یں  
نہیں۔

بھولا۔ تاہیوں تے آکھیائے گھر جا کے آرام کرو خیزنال۔

اک واج۔ ایہ وی تیری اولاد نہیں گلابو۔

گلابو۔ نہیں او جوانا۔ ایہ گل نہ آکھیں۔ کسب کما ون شیرنی دا دودھ پچا ون  
اے۔ کسبی دی کوئی اولاد نہیں ہوندی۔ کوئی ماپے نہیں ہوندے۔ کسبی  
کسب دا ای پتر ہوندائے تے کسب دا ای پیو ہوندائے۔ (کھیر)  
میں ایہناں نوں پتروں بھنڈ بنا ونا چا ہوندا ساں۔ ایہ مینوں بھنڈوں  
پیو بنا ونا چا ہوندے نیں۔

(اک جنا گلابو نوں ویل دیندا اے)

گلابو۔ ویل۔ شیرنی دے دودھ دی ویل۔ کسبیاں دے صدق دی ویل۔  
صدق والیا توں ویل ودھائیں تے لیکھے لائیں۔

بھولا۔ (ویل دی ہیک) تے دو تو لے دودھ وچ پنچی کلپانی کیٹی دا پائیں۔

۲۔ (وعظ والی ہیک) نہیں تے جلاب لگ جان گے پچیاں شیر دیاں نوں۔

۳۔ (وعظ والی ہیک) تے چڑیا گھر والے اوہناں نوں غیر حاضر وکھال کے

وچ رجسٹراں دے۔ اوہناں دی گھر لے جان گے چربی واسطے طاقت

دائیل بنان دے۔

بھولا۔ آہو سانھیاں دی ابادی جوں گھٹ گئی اے۔

۲۔ کیہہ بنیاں نیں سانھیاں نوں ؟

بھولا۔ پنجاہ فی صدی عرب ٹر گئے نیں۔ پنجاہ فی صدی بھرتی ہو گئے نیں۔ تے

باقی سنسر والیاں کٹ دتے نیں۔

۲۔ (پٹاس) میں سنہیاں گورمنٹ نے سانھا پال سکیم کدھی اے۔ ریٹائر

افسراں نوں مرتبے دتے بان کے۔

۳۔ رٹا ر بھنڈاں دا کیہہ بنے گا ؟

بھولا۔ اوہ کاواں دے مونہہ چوں بُر کیاں کھون گے۔

۲۔ (پٹاس)

گلابو۔ (خلقت نال) پینچو میرانیاں اچے وچے ای اے۔ مینوں دیا جائے

بئی بھنڈتے کاں وچ کیہہ فرق ہونداے۔

(اک جنا گلابو نوں ویل دینداے)

گلابو۔ ویل بھنڈاں دیا رباتوں ویل ودھائیں۔ بھنڈ رکھیں تے کاں نہ بنائیں۔

(مہراں پھرتی نال گلابو دے ہتھوں ویل بھپٹ لیندی اے)

گلابو۔ چلو کاں داکم میٹھوں سُن لو۔ تمہواں دی تاڑ رکھنی۔ دیگاں دوا لے

کنیا ونا نے کاگور و لا پاوننا۔ لاکڑیاں کولوں توہے توہے کراوئی تے

لاکڑیاں دی دکائی جوٹھ چنجاں نال چاوئی۔ ہُن بھنڈ داکم کیہہ اے

ایہہ تیں دستو۔ (کھلیر) سوچ کے دتیا جے۔

(خلقت وچ مٹھی مٹھی کھس کھس)

گلابو۔ چنگا تیں سوچو تے میں تو لاوناں۔

اک واج۔ کیہہ ا ؟

(لاس)

گلابو۔ تہاڈا

(لاس)

گلابو۔ (گاوندائے) اسیں بئی لکھ جہان دے۔

سانوں اگ تھیک

اسیں بئی لکھ جہان دے۔

( پہلوں گلابو دا واج سُرتے نہیں لگدا - ہولی ہولی نتر جا وندا اے  
تے پڑنوں پکڑ کرن لگدا اے )  
مہراں - بھولیا - وے پتر ڈھو لکی پھڑ کے اگانہ ہو وو - پیو دی بڈھی جان  
جے کلے دی -

۲ - آہو بی اگے ہو بی -

بھولا - کیسہ بول نہیں - بی لے دے مینوں لکھ ڈوریا ؛  
مہراں - وے ڈوریا دادی بہتن نوں پواؤنا ای - اوہی سُن -  
گلابو - اسیں بی لکھ جہان دے

سانوں اگ تھیک

لکھوں ودھ جینہاں نوں جڑیا

بھگتن کل تریک

اسیں بی لکھ جہان دے

( اک جنا ویل دیندا اے )

گلابو - ویل - جہان دیاں لکھاں دی ویل - لکھاں والیا توں ویل ودھائیں  
تے ڈھکھی دا بھانبر بنائیں -

( مہراں ویل بھو جھپن پے بندھی اے - بھولا ڈھو لکی تے ہتھ

مار کے واج لا وندا اے - ۲، ۳ وی نال لگدے نیں )

بھولا - لکھوں ودھ جینہاں نوں جڑیا -

۲ - بھگتن کل تریک

۳ - اسیں بی لکھ جہان دے

گلابو - ( خلقت نال ) جو انو پیسے نوں میں نہ تے نہیں کر سکدا - دوزک ہوں

نال لگی ہوئی - (ہا سا - مہراں ہس کے گلا بونوں دھپھہ مریندی اے)  
پر گاؤن دی ویل گوں کے دئی دی اے -

سانوں اگ تفتیک اسیں بی گکھ جہان دے  
دکجھ منڈے پہلوں شرموں کشرمی نال رلدے نیں - مڑ وکھو  
دیکھی کھل ڈلھ جاوندے نیں - جیویں جیویں پڑ گاؤن وچ رلدا  
گلا بولہر وچ آ کے انترے بولی آؤندا اے - اوڑک سارا پڑ  
گاؤندا انترے چاؤندا تے دہراؤندا اے

چڑھیاں ہویاں دی لہندی ویکھے  
ساڈھی اکھ بریک

اسیں بی گکھ جہان دے  
کوڑے نہ جدتائیں جان ہمارے  
لگدی اے سانوں لیک

اسیں بی گکھ جہان دے  
جنی گل گوائے کوئی  
اونا ای سیک ودھیک  
اسیں بی گکھ جہان دے  
ماکیاں دے اوڑے جنگل

ساڈے اج شریک  
اسیں بی گکھ جہان دے  
باہردں ساڈا دھوں نہ نکلے  
اندر چنگ اڈیک

اسیں بی لکھ جہان دے  
 ( پڑ وچ بھنگڑا پیا پیندا اے ، گلابو کھلو جا وندا اے تے بھنگڑا  
 مٹھاپے جا وندا اے )  
 اک واج - گلابو بول وئی -  
 گلابو - ہُن تہاڈی واری اے -  
 ہور واج - عاشقا ہو وئی اگانہہ  
 عاشق - مینوں سنگ آوندی اے گلابو کولوں -  
 گلابو - جے عاشق ہیں تاں اگانہہ ہو - گلابو تے سُکا کسی ہو یا -  
 عاشق - میں بول دینا تئیں چالینا -  
 اک جٹا - جے ڈگے نہ تے چالیساں تینوں وی - بول توں -  
 عاشق - سنو سنوئی کھٹیاں پھلاں دی گل سنو  
 ہاڑ دیاں چونکاں وچ جہڑے کھڑ دے نیں -  
 وڈیاں وانگ اسیں آہرے لگے شدے نہیں  
 بالال وانگ ایہہ آپنی مڑ مڑ گندے نیں  
 اک جٹا - ہلا وئی کیہہ آہندے نیں ؟  
 عاشق - چارے کنیاں جینہاں دیاں خالی - چارے کنیاں - چارے کنیاں  
 جینہاں دیاں خالی بی اوہناں ڈورنا کیہہ -  
 گلابو - ( پنخ کے ) بتے بتے بی اوہناں ڈورنا کیہہ -  
 پڑ - بتے بتے بی اوہناں ڈورنا کیہہ  
 عاشق - اسیں پانی اندر پانی - اسیں پانی - اسیں پانی اندر پانی  
 تے ڈلھنا بھرنا کیہہ -

پڑے - بے بے سئی ڈلھنا بھرنا کیسہ -  
 عاشق - تئیں چڑھ گدیاں تے پھیر وگوٹاں مکر دیاں  
 تئیں گھر گھر واڑو رسماں جھولی چکن دیاں  
 اک جنا - بوہے تکن دیاں  
 گلابو - جھونگے جھپن دیاں  
 عاشق - سانوں مکر دا بتا دے کے ہتھ وڈھائے جے -  
 پڑے - بے بے سئی ہتھ وڈھائے جے -  
 عاشق - ساڈیاں ہتھاں تے مہراں لا کے نوٹ چلائے جے -  
 پڑے - بے بے سئی نوٹ چلائے جے -  
 عاشق - سانوں انھیاں کھوہاں وچ ٹوک کے راج کمائے جے -  
 پڑے - بے بے سئی اچ کمائے جے  
 عاشق - ساڈے پیڑ ہینرے وچوں پنگرے ہتھ نوں  
 پڑے - بے بے سئی پنگرے ہتھ نوں  
 عاشق - بھاڑے دیاں ڈانگاں تے  
 ہتھ جیہڑے بھارو نہیں  
 اک جنا - ہتھ جیہڑے مارو نہیں  
 اک جینی - مویاں نوں دارو نہیں  
 گلابو - بے بے سئی ہتھ جیہڑے دارو نہیں -  
 پڑے - بے بے سئی ہتھ جیہڑے دارو نہیں -  
 ( بھنگڑا ترکھا ہو کے سبھے سبھے مٹھا پے ویندا اے - لوک ہولی  
 ہولی مڑھک ویندے نیں - )

اک واچ - ہن پتہ لگائے بھنڈا کم کیہ ہوندا اے۔  
گلابو - آپنے کم داوی پتہ لگا ای جوانا ؟  
دتا - میں اک گل پٹھنی سی تیرے کولوں - اوس ویلے دی پی رڑکدی اے۔  
گلابو - کیہ ناں ای -

دتا - دتا  
گلابو - پٹھ دتیا متے میری ہنچ وچ ہووے۔  
دتا - توں جہڑا آہنا میں بنی کسب کما ون شیرنی دا دودھ پچا دن اے۔ تے  
پھیرا میں کیہ آں ایں کسی نہیں ؟

گلابو - کیہ کسب اے تہا ڈا۔  
دتا - مشیناں اگے کھلونا۔  
گلابو - اوہ کاہدا کسب اے۔  
دتا - تے ہو کسب کیہ ہوندا اے۔

گلابو - جہڑا بندے دے ہتھ پیر بناوے - اوہ دیاں اکھاں اوہدی جلیجھ  
اوہدے کن بناوے

فاروق - صنعتی پرولتاریہ عالمی انقلاب دا ہراول دستہ اے - ایہدا تمام تر  
شعور ایہنوں سرمایہ دارانہ صنعتی تجربے نے دتائے - ایہہ کسب کمال  
نہیں تے ہو کیہ اے -

گلابو - دتیا ایہہ کون ای جوانا ؟  
دتا - ساڈے لیڈر نہیں فاروق ساب -  
گلابو - یجن عطائی نتھی کنٹھ سہا وڈا -  
دتا - اوہ کیہ ہو یا -



گلابو۔ تے چہڑا فروق لیڈر بولیا تے اوہ کیہہ ہویا۔ کیوں وئی پرھے والیو  
 میری گل سچی اے کہ فروق لیڈر دی۔  
 اک واج۔ ساڈے ولوں دونوں سچیاں نیں۔ معرفت دیاں جوں ہونیاں۔  
 بھولا۔ چڑی گھٹ بھگیاڑ چھو نا گھیں گھیں۔  
 مہراں۔ جیہہ نیفے پج کر دے۔

بھولا۔ بے بے یہ معرفت کی بات چیت ہے۔ تم کیوں اپنی سنسر کی  
 کینچی چلاتی ہو۔

( تقریر دا پنیرا بھدا تے۔ پہلوں ہتھ وچ ”مائیک“ پھڑکے  
 ٹھونگے نال ٹسٹ کریندا اے مڑ پھوک نال )

گلابو۔ جے توں بھنڈتے لیڈر وچ فرق دس سکیں تاں تینوں بولن واجب لے  
 بھولا۔ ( مڑ مائیک ٹسٹ کر کے تقریر دا اے ) بھنڈا اور لیڈر میں فرق یہ ہے  
 کہ جگتیں بھنڈ کرتے ہیں۔ ویس لینے کو لیڈر آجاتے ہیں۔

۲۔ بھنڈاں نوں جتیاں اگوں پنیدیاں نیں تے لیڈراں نوں پچھوں۔  
 ۳۔ لیڈراں نوں ماپے جمدیاں کھلا چھڈ دیندے نیں۔ بھنڈاں نوں دفنا کے  
 دی اتے کھوتے رہندے نیں۔

گلابو۔ تیں ایہناں گڑاں دا کلان نہ سنو فروق ساب۔ تیں اپنی گل دا مطبل  
 کر دیو میں اپنی دا کر دینا۔

فاروق۔ ایس ویلے تے تیں ای گلان کرو یا بابا! اسیں تے سُفن آئے آل۔  
 بھولا۔ اڈکاں !

[ گلابو ویل نہیں ہو کدا۔ پیسے پھڑکے جھٹ دا جھٹ کھلوندا  
 اے۔ مہراں نال ای ویل جھپٹ لیندی اے۔ تے پیسے پلے

بھدی بھولے نوں پنیدی اے۔ ]  
 مہراں۔ وے توں کجیا نہیں رہندا۔  
 بھولا۔ میں تینوں تے نہیں آکھیا بے بے ایویں نہ میرا جلسہ خراب کر۔  
 گلابو۔ ویل۔ وڈھی دی ویل۔ رباتوں وڈھی دا مال دوزک چ پائیں تے بھنڈ  
 نوں نھاتا دھوتا ڈھیٹھ بنائیں۔

( ہا سا۔ مہراں ہس کے گلابو نوں دھپھہ مریندی اے )

دتا۔ میری گل تے وچے ای رہ گئی گلابو۔  
 گلابو۔ تیرا کسب کوئی کسب نہیں دتیا۔  
 دتا۔ کیوں ؟

گلابو۔ جیہڑیاں مشیناں اگے کھلونا تیں اوہ تیریاں نیں ؟  
 دتا۔ لگدیاں ساڈیاں ہڈاں دی پیھ نال نیں۔ پر ساڈیاں نیں۔  
 گلابو۔ تینوں تیری محنت مل جاندی اے ؟

دتا۔ محنت تے مالک لے جاندے نیں سانوں تے اوہو کاں والا بھورا  
 سٹ کے اڈاوندے نیں۔

گلابو۔ مشیناں بگائیاں۔ ہتھاں دی کیتی بگانی۔ تیرا دل تیریاں ہتھاں نال  
 رسدائے ؟

دتا۔ نہیں۔

گلابو۔ مڑ تیرا شوہ تیرے اندر کیکن وٹے۔ شوہ نہ وے تے اندر ویلاتے  
 نہیں رہندا۔ کسے تال رہنا ہویا۔ سو اندر میں رہندی اے۔ پھڑپھڑ  
 انھی ڈوری گنگی۔ مڑ وے کھانی۔ کیہہ وڈے لوک کیہہ پھوٹے لوک۔  
 بھ آپو آپنی میں دے راتب نی۔ بوپئی ہوئی آ اندراں وچ۔ موتیاں

شیاواں جاں پھیلا دیاں نیں جاں سُنگر دیاں نیں - میں وڈا بندہ بنا  
سکدی اے - چھوٹا بندہ بنا سکدی اے - کبھی نہیوں بنا سکدی -

راجو - گلابو جے مشیناں نہ ہون دیاں تے ایہہ پڑکیوں بچھدا ؟

گلابو - کیہہ ناں ای جو انا - کھلو کھاں -

راجو - بیٹھا ای ٹھیک آں توں گل کر -

اک واچ - راجو راکٹ !

گلابو - حق آکھیا ای راجو راکٹ - جی کر دائے تیرے ناں دی ویل ہوکاں -

( اک جناراجو دے سروت وار کے ویل دیندائے )

گلابو - ویل - ویل - رباتوں حق والیاں دے پڑنھائیں تے راجو راکٹ کولوں

ہمیش ای حق اکھوائیں - آہ - مشیناں نہ ہون دیاں تے پڑکیوں بچھدا -

کھوہ نہ بچدے تاں یار کتھے ڈھکدے - وہین نہ وگدے تے ڈاراں کتھوں

جڑ دیاں -

بھولا - ویاہ نہ ہوندے تے بھنڈ کتھوں کھاندے - ( مہراں ویل سانجھدی

بھولے نوں چھبی دیندی اے )

گلابو - وہین نہ وگدے تے ڈاراں کتھوں جڑ دیاں - پر جتھے بگانی چوگ ہوئے

اوتھے بگانی پھاہی وی ہوندی آ - راجو راکٹ -

راجو - جے مشیناں میریاں ہو جان تے -

عاشق - پھیر پھاہی تیرے ہتھ ہووے -

اک واچ - راجو راکٹ اینڈ سنز لمیٹڈ -

گلابو - نہ بی - تیریاں نہ میریاں -

عاشق - تیر میر مک جائے تے میں مک جائے -

گلابو۔ مک کا ہنوں جائے کھل جائے۔ ساڈیاں وجوداں دے پنجر لویں چھٹ  
 کے بے قید ہو جائے۔ ساری خدائی نال اک مک۔ بے روک۔ نیچ۔  
 میں بے قید میں بے قید نہ روگی نہ وید (اک جٹی ویل دیندی اے)  
 گلابو۔ سخی بلھے شاہ دے ناں دی ویل، بھیناں تے بھر جائیاں دی ویل۔  
 سخی ہن بھیناں تے بھر جائیاں کولوں فقراں نوں تھاپڑے دوائیں تے  
 ویل ودھائیں۔

بھولا۔ کاواں دی عیش اے بٹی نہ کوئی اوہناں لئی پنجرے بنو اوندائے نہ  
 پھاہیاں اڈدائے۔ کھلا کھاڈتے ننگا نھاؤ۔  
 ۲۔ (گلابو دی نقل وچ ویل ہوک کے) رباتوں کاں رہن دینیں راجو راکٹ  
 نہ بنائیں۔

۳۔ مجوراں دے جلے چ سانوں ویل دا مونہ نہ دکھائیں۔  
 (فاروق بھولے نوں ویل دیندائے)

بھولا۔ (چھیتی چھیتی) فروق ساب دی ویل۔ ساڈے لیڈر دی ویل۔ ساری قوم  
 دے لیڈر دی ویل۔

گلابو۔ آکاواں تینوں چوری پاواں۔

(مہراں نال ای بھولے دے ہتھوں ویل کھوہن لگدی اے۔ بھولا جھکا  
 دے کے اپنے کھیلے چ پاوان دی کردا اے پر مہراں کھوہ لیندی اے۔  
 بھولا۔ (کھج کے) دونہاں پارٹیاں دیاں وٹاں اکوڈ بے چ پائی آ۔ آ پے  
 جلوس کڈھا بہیں گی۔

مہراں۔ دے کھماں نوں کھاندائے جلوس۔ میں جیتی تے لکھنی آں۔ تیں  
 رتاں نوں کھواڈ کمائیاں (بھولے والی ویل کڈھ کے چڑھ کر کے اوہدے

مُونہ تے مار دی اے - بھولا پیسے پنج کے کھیسے پالیندا اے )

بھولا - سنسر !

۲) سینت دی کینچی مہراں دے مونہ اگے چلاؤندا اے - مہراں

دے بولدیاں بھولا چرٹر ہوئی ویل کڈھ کے گیند ونگر اچھا لائے

تے فیلڈراں ونگر کچ کر کے باہواں اُچیاں کر کے ٹپدا اے - ۳،۲

ساتھی فیلڈراں وانگوں ٹری مریندے نس کے ادہنوں تھا پڑا دیندے

تے جھے مریندے نیں - ایہ سارا کم ادہ ڈاڈھی پھرتی نال

کریندے نیں تانجو پڑوا دھیان مہراں ولوں ہٹے - )

مہراں - رنوں آکھو خرچے کرن پورے ..... جیہڑیاں انھیاں سوئیاں چ

میں دھاگے پئی پاؤنی آل ادہ تے میں جاننی آل نہ ..... اونتری ہت

داپتہ نہیں راتیں سرچ پینی اے کے دینیں ..... مالک بھپیں مہینیں

کرایہ ودھان دی آکھ دیندا ٹے ڈھٹھے کھوہ دا ..... )

بھولا - تینوں ڈاکٹر اقبال نے آکھیا سی بھند بھم -

۲ - کوئی شیخ جمدیوں ہن فون تہا نوں حج تے گھل کے رمان نال بیٹھے ہوندے

۳ - کوئی ملک چودھری جمدیوں - ادھے پاکستان نوں جدے دا پاسپورٹ

بنوا دیندے ادھے فون دبئی دا -

بھولا - ایہہ گلیاں ہو جانڈیاں سنجیاں - وچ توں پلازے تے پلازا پواندیوں

دینیں کلی شاپنگ کردیوں شامیں چاچے نال شاپنگ کردیوں - ناشتے

لنڈن تے پنچ نیویارک تے ڈز جپان -

۲ - توں بھند جھے جینہاں نوں کوئی چھتر دی ہدارا نہ مارے -

بھولا - جیہڑے مرن لگے پانی منگن تے گوانڈھی آکھن نقلوں کر دے نیں -

۳۔ جیہڑے ویا ہواں دیاں بوٹیاں ہیٹھاں کران لئی بُسیاں سیاسی جگتاں  
دی جوین ونڈ دے پھرن۔

مہراں۔ میں بھنڈ نہیں جھے۔ میں تہانوں برادری کولوں توڑ توڑ کے سانہیا۔  
لوکاں دے بھانڈے مانجھ مانجھ کے پوترے دھو دھو کے تہانوں  
سکولے گھلیا۔

بھولا۔ اوہو۔ تہے ای۔ ماشٹرنوں پتہ لگ گیا ہونائے نا۔ ایہہ بھانڈے  
مانجھن دا کورس کر کے آٹے نیں ماں دے پیٹ چوں۔ اوکس  
پڑھائی ویلے نا بھانڈے منجوان سانوں گھر ٹور دینا۔ تے چھٹی مگروں  
نا آپنیاں پنیاں ملوان دے ویہہ رپتے منگنے۔ ٹیوشن فیس۔  
( ایہہ گلاں کریندیاں ترونہ بھراواں اُتے اک عجیب بالال  
والا رنگ آدیندا اے۔ جیویں رل کے کوئی شرارت پئے  
سوچدے ہون )

بھولا۔ اتے سانوں شریف آرہتیئے دی ہٹی بہا دتا۔ بی دوروں نیڑوں  
ماما لگدا جے۔ بڈھیاں ترے جے تے ایانا اک نہیں۔ جے حیلہ کروتے  
ایدا کاروبار سانہ سکدے او۔

( پڑوچ کھسر پھسر )

۲۔ جدوں ساڈی رپوٹ آونی بی ایہہ کم نہیں کر دے گا ہکاں نال جگتاں  
کر دے نیں۔ تے اتے ساڈے نال اوہ کرنی جیہڑی نویں ٹھانیدار  
مشتبیاں نال کر دے نیں۔

( کھسر پھسر پوچل ودھدی اے )

۳۔ جدوں رپوٹ آونی بی ہیٹوں پھٹ گئے نیں۔ اتے سانوں برآمد کر

کے مُڑ شریف آرہتے دے بے کرا آونا۔

اک واج۔ بے او وڈھیا کسبیا !

ہور واج۔ بڈھا فراڈیا۔

( رلیاں ملیاں واجاں کجھ لوک کھلو جانڈے نیں )

اک کھلوتا۔ ( چھبی دے کے ) ایہہ سانوں سبق پڑھاون آیا سی جے فراڈیا۔

( رولا۔ چوکھے لوک کھلو جانڈے نیں )

واجاں۔ گل تے سنویار۔

بڑا برداشت کیتاٹے۔ کوئی حدوی ہونڈی اے۔

ساڈا صبر ہور نہ آزمایا جائے۔

مکاویار ایہہ بک بک ہن۔

باہر سٹوس چک کے۔

اوہ پر ہویا کیہہ اے۔

ایہنے فاروق ساب دی بزتی کیتی اے۔ ہن ایہنوں بندہ

بنا کے ای ٹوراں گے ایٹھوں۔

فاروق۔ میں ساتھیال نوں درخواسست کراں گا کہ میری ذات نوں درمیان فرج

نہ لیاندا جاوے۔ میری عزت بے عزتی دا کوئی مسئلہ نہیں میں اک عام ورکر

آں۔ میری عزت تہاڈی عزت اے۔ ہاں اصولی گل ضرور اے۔ ساتھیو!

میں ذاتی طور تے پہلوں امی ایس پروگرام دے خلاف ساں محنت کشاں

دی مجاہدانہ جدوجہد دے خلاف جیہڑی سازش کلچر دے ناں تے ہور ہی

اے۔ میں تے اوس توں پوری طرح آگاہ ساں اور ہاں۔ اچھا ہویاے

ساڈے کچھ دوست وی بے نقاب ہو گئے۔ اور تہاڈے واسطے دست

دشمن دی تمیز دی آسان ہو گئی - دوستو! انقلابی جدوجہد اک ہمہ جہتی عمل  
 اے مگر بنیادی طور تے ایہہ جدوجہد معیشت دے میدان وچ محنت کش  
 طبقے دی خستی بالادستی دے حصول دی خاطر برپا کیتی جاندی اے - جد  
 ایس بالادستی دا حصول مکمل طور تے عمل وچ آ جاوے تے بالائی ڈھانچے  
 اُتے اپنے آپ ایہدے خاطر خواہ اثرات مرتب ہونا شروع ہو جائے  
 نہیں - مگر ساتھیو! کچھ عرصے توں لوک ثقافت اور لوک زباناں دے  
 ناں تے محنت کشاں نوں گاؤن و جاؤن اور شعر و شاعری دی اقیون  
 دے کے اوہناں نوں گمراہ کرن دیاں بلکہ بے دست و پا کرن دیاں او  
 کوششاں کیتیاں جا رہیاں نیں - جینہاں دے پچھے پسماندہ ٹٹ پونجیا  
 شعور جاگیر دارانہ ثقافت دی باقیات تے سامراجی گماشتہ ثقافت دیاں  
 زیریلیاں گولیاں نیں - جیہڑیاں ہمیشہ ساڈی انقلابی بیداری اور عالمی  
 محنت کش تحریک دے نچتہ شعور تے اپنے وطن دے معروضی حالات  
 دے سنجیدہ مطالعہ دی بنیاد اتے بری طرح ناکام بنا دتیاں جان گیاں -  
 ساتھیو! ایہہ لوک مراعات یافتہ طبقے دے ڈرائنگ روم دی نام نہاد  
 رومانی فضا وچ چرس دے دھوئیں دی آڑ وچ اپنے خلیث سفلی  
 جذبات دی تسکین دی خاطر ساڈے بزرگ کلاسیکی شعراء نوں استعمال  
 کر کے ساڈی بدنامی دا باعث بن رہے نیں - لیکن ایہہ لوک بجائے  
 خود کوئی اہمیت نہیں رکھدے - ایہناں دے پچھے بائیں بازو دیاں  
 اوہ نام نہاد کھسی پارٹیاں تے اوہناں دی متضاد قول و فعل دی حامل  
 بزدل نیشن یافتہ قیادت اے جیہڑی اپنی ٹٹ پونجیا پدرشاہانہ چودھرا<sup>سط</sup>  
 نوں برقرار رکھن واسطے اور محنت کش تحریک نوں ترمیم پسندانہ عاقبت



کوشی دے حوالے نال گمراہ کرن واسطے ایہناں لوکاں نوں استعمال کر  
 رہی اے - اسیں ایہہ سب کچھ ہرگز نہیں ہون دیاں گے - اسیں  
 ایہناں نوں مزید بے نقاب کراں گے - ہُن ایہناں نے ٹریڈ یونین محاذ  
 تے ساڈی طاقت اور باقی ماندہ محاذوں تے ساہما سال دی انتھک محنت  
 دے بعد بروئے کار لیاندے گئے محنت کسٹ طلبا اتحاد نوں کمزور بناون  
 واسطے نت نویں ہتھیاراں دے حوالے نال میدان وچ آؤنا شروع  
 کردتاے - ایہہ اجدا پر وگرام او سے سازش دی اک مذموم کڑی اے -

نعرے :- غداروں کے یار - ٹھاہ

دشمنوں کے دتے - ٹھاہ

( اک ہور لیڈر جیہا بندہ اٹھداٹے - مونہہ تے کالی خشناسی، سر  
 تے ٹوپی ہتھ وچ نکری مٹھ والا بریف کیس - عینک دے کالے  
 فریم دیاں باہیاں اُتے لٹکنے پترے لگے ہوئے نیں )

واجاباں - بہہ جا

بہہ جا

تشریف رکھ اوئے

فاروق - دوستو - کامل سب نوں اظہار دے جمہوری حق دے حوالے نال  
 بولن دا موقع دتا جاوے -

کامل - ( خطیباں والی لٹک نال لگدا اے مونہہ وچ پان ہے پر پان

ہے نہیں - ع ق سنگھوں کڈھداٹے - فاروق وانگ پوندا ہی

جھگو جھگ نہیں ہوندا ہولی ہولی پیدا اے پر تپ کے وی

لٹک نہیں چھڈدا -)

عزیزانِ گرامی قدر - میں تہاڈا اور آپنے فاضل دوست فاروق صاحب دا  
 بے حد شکر گزار آں کہ مینوں آپنے مافی الضمیر دے اظہار دا موقع دتا  
 گیا اے - ایہدے وچ شک نہیں کہ ساڈی جدوجہد اور جدوں میں  
 ساڈی جدوجہد آکھناں تے میری مراد ہوندی اے تہاڈی جدوجہد -  
 تہاڈی اور ساڈی مشترکہ جدوجہد - ہاں تے میں عرض کر رہیاں ساں کہ  
 ساڈی جدوجہد محنت کشاں دے جائز حقوق واسطے ہے - پر ایس  
 جدوجہد نوں ایس نیک اور مقدس جدوجہد نوں بعض وطن دشمن عناصر  
 جس طرح آپنے گندے مقاصد واسطے استعمال کر کے ملک دے امن  
 اور سلامتی نوں برباد کرنا چاہوندے ہن اوہ کوئی ڈھکی چھپی گل نہیں ساں  
 ایہناں بد نیت عناصر توں ہر وقت خبردار رہنا چاہیدا اے - ایہہ لوک  
 ثقافت دی آرٹ وچ اسلامی روایات اسلامی اقدار اسلامی شعائر و مذاق  
 اڑاوندے ہن - ملک دے اساسی نظریے دیاں جڑاں کٹدے ہن -  
 بزرگانِ دین دے اقوال نوں اوہناں دے مقدس کلام نوں آپنے  
 مخصوص مذموم مقاصد واسطے توڑ مروڑ کے پیش کر دے ہن - ایہناں  
 لوکاں نوں نہ ماں بھین دی تمیز اے نہ وڈے چھوٹے دی - مکاری ،  
 منافقت اور دغا ایہناں دی تکنیک اے - اخلاق باختگی ایہناں دی  
 مجبوری اے - کون لوک شامل ہن ایہناں دیاں صفاں وچ - دہریے  
 کمیونسٹ مغربی آزاد خیالی دے کوڑھ دے مارے ہوئے مادر پدر  
 آزاد عناصر - دوستو! ایہہ گل شک و شبہ توں بالاتر اے کہ محنت کش  
 ساتھیوں اور بھراواں دے حقوق سراسر نظر انداز کیتے گئے ہن - او  
 اچ نہیں عرصہ دراز توں نظر انداز کیتے گئے ہن - ایہہ گل مزید برداشت

نہیں کیتی جانی چاہیدی اور نہیں کیتی جائے گی پر سانوں ایہہ وی نہیں  
 بھلنا چاہیدا کہ ساڈا دین اعتدال سکھا وندا اے۔ اسیں اپنے حقوق  
 واسطے لڑاں گے۔ پر اپنے فرائض دی ادائیگی ولوں وی کسے نوں اپنے  
 دل انگلی نہیں چکن دیاں گے۔ ساڈے اپنے حقوق و فرائض ہن مالک  
 دے اپنے حقوق و فرائض ہن۔ لیکن میرے عزیز اگر اسلام دے دشمن  
 کامیاب ہو گئے بیرونی نظریات دے حامی کامیاب ہو گئے تے دین  
 داناں کوئی نہ لئے گا۔ اگر دین داناں کوئی نہ لئے گا تے نظریہ مسٹ جیگا  
 اگر نظریہ مسٹ گیا تے ملک نہ رہے گا۔ اگر ملک نہ رہیا تے نہ مالک  
 رہے گا نہ مزدور۔ نہ امیر رہے گا نہ غریب۔ دھیاں بھیناں دیاں عزتاں  
 لٹیاں جان گیاں۔ آون والیاں نسلاں بے غیرتی دے ٹکڑیاں تے  
 پلن گیاں۔ اور ساڈے اُتے لعنت بھیجن گیاں۔ دوستو میں تہاڈا زیادہ  
 وقت نہیں لینا چاہندا۔ میں آخر وچ صرف اپنا کہنا چاہوں۔ کہ میرے  
 فاروق صاحب نال ہزار اختلافات ہون ایس معاملے وچ میں اوہناں  
 دی مکمل تائید کرناں۔ اوہ جو وی اقدام تجویز کرن اوہدی مکمل حمایت  
 کرناں۔

فاروق۔ ساتھیو! ایہہ اک ایسا معاملہ اے جہدے وچ متحدہ محاذ دا اصول  
 اپنایا جاسکدا اے۔

[نعرے۔ ”دشمنوں کے دتے ٹھاہ۔ غداروں کے یار ٹھاہ“۔ پنج  
 سنگڑے گلابوں و دھدے نیں۔ اوہنوں گھیرا گتدے نیں اوہناں  
 دے بولن توں تے پینٹریاں توں جا پدا اے۔ کسے کارروائی  
 لئی اپنے آپ نوں گرم پتے کر دے نیں۔ ایہہ سارا کم اک ناچ

دے روپ ورج اے۔ پوند گھیرا موکلا اے۔ ہولی ہولی ناچ دی لے  
ترکھی ہو ویندی اے تے گھیرا سوڑا۔ پڑ وچ دہل جیہی بہہ گئی اے جیہڑی  
محلّیاں وچ پُلس دی کاروائی توں پہلوں بہہ جاندی اے۔)

پنچے۔ بنا سیتی بھنڈ

مجھے باز فراڈیئے

ڈبہ پیر

گنڈھ دیا پوریا

دنیا دارا شوریا

( نعرے۔ ” غداروں کے یار۔ ٹھاہ۔ دشمنوں کے دتے۔ ٹھاہ“ )

ساڈیاں جہڑھاں وڈھن والیا غدارا۔ اجنٹا !

ساڈیاں دشمنناں دیا دلتیا۔ اجنٹا !

ملک دیا دشمننا۔ گندیا !

دین دیا دشمننا !

چرکیا۔ بھڑو یا !

( ” غداروں کے یار ٹھاہ۔ دشمنوں کے دتے ٹھاہ“ )

ہُن توں ننگا ہو چکیا نہیں اوئے۔

ہُن تیرا وار ساڈے تے نہیوں چل سکدا۔

بڑیاں بڑیاں نوں راہے پادتاٹے ایہہ کیہہ لے۔

چک دیو ایہدا بھنگ بھوسڑا۔

لاہ دیو ایہنوں چکوں

( گلابو نوں پے کے کچھ دھرو کرن لگدے نیں )

بھولا - چل بے بے ایتھے تے محاسبہ پین لگای -

وعدہ مافاں دی واری آون توں پہلوں ای ٹھٹ چلو -

مہراں - نہیں وے میں نہیں جے جانا ( اگانہ ودھ کے پنجاں نوں روکدیاں )  
تیں میرے نال گل کر وے - میں دسنی آل کیہڑا اصلی اے تے کیہڑا  
نقلی - منڈیاں نوں پڑھنے پاؤن لئی میں ایہدیاں بوٹیاں تروریاں - کیوں  
نہ ترورڈی یں - بھنڈ دی رن تے میں آپنیاں بھاگاں نوں اکھوا لیا -  
اگوں بھنڈاں دی ماں میں کیوں اکھواندی - کیوں - تہاڈے چوں کنے  
نیں جیہڑے آپنیاں پتریاں نوں دیہاڑیاں کراؤن دی سوچدے نیں - لگے  
واہ تیں اوہناں نوں پڑھاؤن داٹل نہیں لاؤندے - دستو مینوں تیں  
نہیں آہندے تہاڈے جے جائے افسر بنن - کیہنوں نہیں سکھاؤندے  
دنیا دے عیش آرام تے حکومتاں - میرے منڈے ای رہ گئے سن  
دھکیاں دھوڑیاں جو گے - اساں کوئی ٹھیکہ تے نہیں کیتا ہویا اپنی  
لہائی دا - ایہہ کوئی کسب نہیں جے ہے تے تیں کیوں نہیں کراؤندے  
آپنی اولاد نوں - خورے کنے جگ ہو گئے نیں سانوں ایہہ نموشی سیٹریاں  
تیں وی چکھو نہ ایہہ سواد - ہر کوئی اپر دیکھے تے اسیں اتھے بنے  
رہیے - ایہہ کیہڑیاں کرماں دا بھوگ اے - جے لیکھاں دا لکھیا سی تاں  
اوہ وہیاں رڑھ پڑھ گیاں - کوئی ذات کذات نہ رہی - ہن تے تھوکاں  
دے مل تر دے نیں - جنی کسے دی ہنج ہو وے - ایہنے مینوں بڑا  
تایا - ایہنوں کسب کرامت دا جھل نہیں سی چھڈا - یں منڈیاں دا اگاسوان  
دا سوچدی ساں - ایہنوں خاوند بناؤندی ساں - ایہہ کسی بن کے میری  
اولاد نوں بچ لاؤنا چا ہوندا سی - اخیر ایہہ مار گیا - دو دلیلا ہو کے میرا

آکھیا کرن لگ پیا - پھیر اولاد میرے تے سٹ کے لانیھے ہو بیٹھا۔  
 جنانی ذات ساں - سکھنے ہتھ ساں - جت میں وی نہ سکی - نہ منڈے  
 پڑھے نہ اوہناں کوئی آہر سکھیا - ایہہ گلابو دے کسی تے نہ بنے پر  
 میں بھنڈاں دی ماں بن کے رہی - ہُن ایہہ چار گلاں جوڑ دے نیں  
 اپنے بال بچھے لئی - ایہہ میرا دیری - میری جُون نوں لگی لیہہ - ہُن اسیں  
 مر کے اک دوجے نوں آزاد کراں گے - ایس جہان تے ساڈا لکھ نہیں۔  
 گلابو - توں نیاں کیتا اے مہراں میں تیرا دیندار آں - بھاویں نیاں وچ دینداری  
 ہوندی تے نہیں - کیوں نیاں ساریاں دا سانجھا اے (سوچدیاں) آہو  
 سانجھا اے سو دیندار وی سارے نیں - میں وی آں -

مہراں - میں تیرے کولوں کیہہ لینائے - میرے جوگا تیرے کول دھروں ای لکھ  
 نہیں سی - توں آپ جوگا ای سیں - جیہڑے آپ جوگے ای ہون اوہناں  
 نوں ویاہ وسیبا نہیں کرنا چاہیدا - تیرے جیھے آپ تے بدھے ہوندے  
 نیں اپنی میں دے دوجیاں نوں سخت مار دے نیں نال بنھ کے -

گلابو - کھیڈاں تے بھھے میں دیاں ای نیں - وکھناتاں ابہہ اے پٹی میں لڑ  
 کیہدے لگدی اے - میں دا توں کون اے - میری میں کسب دے لڑ  
 لگی ہوئی سی - نہیں - کسب دے لڑوی کیہہ - کسب آپ کیہہ ہونداں  
 حرفاں دی کھیڈ - ہر کسب کمال بچھے کوئی ہور دنیا ہوندی اے - سفنیاں  
 دی آساں دی - او تھوں ای عشق والی کستوری ہلدی اے تے کسباں وچ  
 جان پنیدی اے - کسباں دی جُون وڈی اے -

مہراں - (خاب خیال وچ) ایو جیہاں گلاں نے کسے ویلے میری مت ماری سی۔  
 گلابو - برادری وچ ہور وی منڈے سن - مشریت سی - اوہدی آڑھت سی - پاپاں

تینوں بڑا گھیر یا - توں ماراں وی کھا دیاں - پراڑ گیوں -  
 مہراں - انجھول ویلاسی - خورے کہا ہارا سی - کیہڑے تارے توڑن تے دل  
 سی - ہن تے چلتے وی نہیں - ڈھوڑ جہم کے پتھر ہو گئی اے -  
 گلابو - توں آکھنا - تینوں ملنی آں تے پر جیہے لگ جانڈے نیں -  
 مہراں - ویاہ ہو گیا تے پرٹٹ گئے - تیرے نال رہن وی قید بن گیا - ماپے گھر  
 نالوں وی کرڑی قید - اٹھے پر چلھا چپٹا - ایانیاں دے پوارے لوکاں دے  
 مہینے - میں تینوں کھٹن کماون دا آکھنا توں متھے وٹ پا کے کھونجے وڑجانا -  
 گلابو - پوندتاں مینوں لگدا سی سبھ تیرا ای دوس اے - توں وچوں دنیا دارنگلی  
 ایں - پر ہولی ہولی چانن لگا - اسان دونہاں رل کے گھمن گھیر وچ چھال  
 ماری اے - میں تینوں باہر کھچن داٹل لایا - مینوں جا پے توں مینوں گھٹ  
 کے چمبڑ گئی ایں - اندرول پئی کھچنی ایں - تیرا نہیں سی دوس - گھمن گھیر دا  
 دستور ای ایہو اے - اوڑک میں تینوں چھڈتا -

مہراں - مینوں چھڈ کے توں آزاد ہو گیوں -  
 گلابو - آزاد کیوں ہو سکنا ساں - میں آپنا گیتیرے اکٹ کر لیا - مینوں گھمن گھیر  
 دے چکر باہر وار سٹن لگ پئے تے تینوں اندر وار - مینوں سمجھ رل گئی  
 بی گھمن گھیر میرے وجودوں وڈیرا اے - میری وتوں باہرا اے -  
 پٹھا وگدا رہساں تاں موت مینوں ایہدے کنڈیاں توں باہر لے جاسی -  
 توں سدھی وگدی ایہدے ڈھرو چکار جا بڈسیں - موتوں اگیرے ساڈے  
 رُوح گھمن گھیر توں چھٹ کے مڑ ملسن -

( جیویں گلابو تے مہراں دی گل ٹری اے - تے لوکاں ادہناں مل  
 گوہ کیتا اے - گھیرا گھت ٹوڑے مال گلابو دلوں ہولی ہولی بے پرداہ

ہوئی گئے ہیں - اوہ اباسیاں لیندے اک دو جے ول اک ادھ گل  
 ریٹھدے ہیں - کدیں کدیں اک دو جے نوں ہورا دھپھہ وی لے  
 کے پیندے ہیں - اک ادھ وار ٹھاپ وٹا ندرادی ہوندا اے - اوڑک  
 بھتے ہنگلاون لگ پیندے ہیں - ایہہ سارا کم اوہناں دی آدنی وانگ  
 ناچ روپ وچ اے - ایہہ ناچ تے وچ پہلے دا اُلٹ اے -  
 گلابوتے مہراں دی گل کچھو کڑے ایہہ ناچ پیا چلدا اے - اوڑک  
 اک ٹو لے وال - (اباسی) چلے باچھا نیندر آگئی اے -

دوجا - چھڈ فروق باچھازی اوزاری اے - (اکڑی) اسیں تے اجے بریک فاسٹ  
 کرناٹے باچھا -

(ٹو لے وال رڈے ہیں)

فاروق - (اٹھداے) آہو بئی چلیے دینیں عالمہ دی میٹنگ وی اے -  
 اک ٹو لے وال - ہر رڈ بیسٹرا آملہ - دن دیاں دن نال باچھا - چلو کوئی جان شان  
 بنائیے چل کے -

(فاروق رڈاٹے - کامل دی اٹھداے - کینیں ہور وی اٹھ رڈے  
 ہیں)

کامل - ویلے دی نماز تے کویلے دیاں ٹکراں - ایہہ مسئلے حل کراں گے تے اسیں  
 کراں گے انشاء اللہ العزیز -

اک ٹو لے وال - (بوہیوں) اوٹے ہن آجا ہڈ ہڈ - زرنے کلجے مرنا ای مسئلے  
 کر کے -

(فاروق کامل تے اوہناں دے ساتھی ٹو لے والاں سننے ٹ  
 جانڈے ہیں - مگروں دو گھڑی چپ رہندی اے - مٹرانج جا پدا



اے نوکیں جاگ پئے نیں - عام بلجل ہوندی اے - کوئی تھاں وٹا ہندے  
نیں - کوئی بیٹھے آسن وٹاوندے نیں )

اک واج - گئی کلیس -

ہو رواج - ہُن گل ہو سی کھل کے -

راجو - ہُن کیہدے نال گل ہوئی اے - تما شبین کٹھے ہوئے دے نیں سارے -

دنا - اوس ویلے توں کیہڑا اگے ہو یوں راجو -

راجو - میں تہاڈیاں مونہاں ول دیہندا رہیا -

عاشق - تے اسیں تیرے مونہہ ول دیہندے رہے -

اک جنا - اسیں سارے تہاڈے مونہہ ول دیکھدے رہے -

دنا - کیوں - ساڈیاں مونہاں اُتے کیہہ لکھیا ہو یا سی - اساں تہا نوں کد دیکھا سی

اک جنی - تسیں جو موہری بنے کھلوتے سو - اساں جاتا کجھ کر سوا سی -

عاشق - اپنی خلقت دڑوٹ کے بیٹھی رہی - کجھ بلجل ہوندی تے ساڈا صدق

بجھدا - سارا کجھ اپن اپیتی ہو گیا - سمجھ ای نہیں لگی -

اک جنی - صاف کیوں نہیں آہندے ڈرگئے سو - اسیں تے صاف آہنے آں

تہا نوں دیکھ کے اسیں وی سمجھیا ڈرنا ای ٹھیک اے -

اک جنا - سارا پھر سٹیج دائے - جے پڑتے تھڑا اک ہوندے تے اسیں

تہاڈے ول نہ دیہندے تسیں ساڈے ول نہ دیہندے -

عاشق - ایہہ کیوں پک ای بی جو توں آہنائیں اوہ سارا پڑ آہندائے -

اک جنا - جے توں پڑوچ ہوندوں عاشقاتے انج نہ آکھدوں -

گلابو - کیہہ ناں ای ؟

جنا - اجے ویلاں توں رجیا ہوں ؟

عاشق - پڑتے تھڑا اک کیویں ہون ؟  
 اک جٹی - جے آکھن وکھین والے تے کرن والے اکوای ہون -  
 دتا - ایہہ ہو سکدائے ؟ - ساڈے پے تے لکھ نہیں جے - کر سکدے اوتے  
 کرو - جے میرے آکھن دی لوڑاے تے میں آکھ دینا - (گوکداے) میرے  
 کول کوئی گڈر سنگھی نہیں جے - میرے تے کوئی ہکھی نہ رکھیو -  
 اک جٹی - ایہہ آکھن دی کاہدی لوڑاے - ہکھی والی کوئی گل رہ گئی اے -  
 اک جٹا - ایہہ آکھن نال تہاڈا کجھ سردا ہوسی دتیا - ساڈا نہیں -  
 بھولا - ایہہ وی ویلا آدناسی - وکنسیاں ای وکنسیاں نیں امیدوار کوئی نہیں -  
 اک جٹا - گواہی دین دا ویلا کھنچ گیاٹے -  
 گلابو - تے ہن جھورے دا ویلاٹے ؟ اگول دن نہیں چڑھنے ؟  
 اک جٹا - کون آکھ سکدائے جیہڑی ہن ہوئی اوہ مڑنہ ہوسی -  
 جٹی - جے اوس گھڑی اسال گواہی دتی ہوندی تے اگول ساڈے چھٹکارے  
 دادن چڑھدا -  
 گلابو - چھٹکارے دادن جے چڑھ جاندا تے چڑھیا ای رہندا ؟ کوئی دن اخیرلا  
 دن نہیں ہوندا ہر گھڑی گواہی دی گھڑی ہوندی اے -  
 اک جٹی - کسے گل دا وساہ نہیں -  
 اک جٹا - بسھ پھوکیاں لگدیاں نیں -  
 ( پڑ ہولی ہولی انہیرے ہو جانداے - )  
 بھولا - ( ہسدا دوہرا ہو کے ) ٹھگیا گیاٹے -  
 ۲ - ( ہسدا بھولے دے ہتھ تے ہتھ مار کے ) چٹے دیہنہ -  
 ۳ - ( ہسدیاں ) مساں مساں اک چانس بنیا کسبیوں عاشق ہون دا - اوہ

دی گیا۔

بھولا۔ نہ پر ساڈے ولوں کوئی کسر نہیں ہوئی۔

راجو۔ ساڈے ولوں دی کوئی کسر نہیں ہوئی۔

(عاشق تے دتا وی ہا سے وچ رلدے نیں)

بھولا۔ اخیرى فتح بے بے دی اے بئی۔

مراں۔ ایویں حرام موتے مردا۔

بھولا۔ نئے ایڈی وڈی قربانی ہوئی سی تے۔

۳۔ ہمیشاں واسطے اک ریت تڑپندی۔

۲۔ آدن والیاں پڑھیاں نول جاگ لگ جاندی۔

بھولا۔ ساڈی خیراے۔ ایس تیمی کٹ لیندے۔ پر ساڈیاں کسب بھراواں لئی اک

نشان تے بن جاندا۔

۲۔ بھجے پرت پندیے۔ ڈھٹھے اٹھ کھلونڈے دے ورھے جلوس نکلا۔

۳۔ دیگاں چڑھیاں۔ بھنڈارے کھلے۔

بھولا۔ ورھے گورھے اخباراں والے بے بے کولوں قوم واسطے پیغام لین آونڈے۔

۲۔ میرا انٹرویو آوندا "شہید کی آخری نشانی"

۳۔ بس اونڈے۔ میرے ہونیاں تیرا انٹرویو کدی نہ آسکدا۔

بھولا۔ تہانوں کون پچھا۔ تیس تے دونوں حرامدے ہونڈے۔ تہاڈا کیٹی دیاں

کاگتاں بچ ناں ای کوئی نہیں پئی تیں شہید دی اولاد او کہ شریف آرہتیے دی۔

گلاب۔ چچو چچ گنڈیریاں۔ (بسا دوہرا ہو جاندا تے پڑول جا کے) چچو چچ گنڈیریاں

پڑا چن چیتی پاننڈے آوندا اے۔ پڑا کا سکھنا۔ لوگ ٹرگئے نیں۔ راجو

عاشق دتا اچھبھے وچ کھلو تے پڑول تے اک دو جے ول ویکھدے نیں)

راجو۔ اسیں گلاں کرن والے لوک ساں اسوں اپنی اخیر ویکھ لئی اے۔  
گلابو۔ انج آکھن نال بھار ہولا ہو جاندا اے۔

راجو۔ بس بھار ای ہولا کرنا اے اسیں ہور کیہہ۔

گلابو۔ ایہہ وی او سے رنگ دی گل اے۔ ایہو جہیاں گلاں کر کے بندہ ڈونگھے  
پانیوں باہر آجاندا اے۔ ترن نہیں سکھدا۔ (ٹھہر کے) گلاں کرن کسبیاں دا  
کم اے۔ حیلہ کرن عاشقاں دا۔ پر کرن دے نال ای جرن اے۔ جر  
دیکھن، پرکھن، جاچن۔

راجو۔ اے کسر رہ گئی ہوئی اے ساڈے جرن والی۔

گلابو۔ پرکھئے دی جاچئے وی۔

راجو۔ بڑیاں سُن بیٹھے آں جاچاں پرکھاں۔ جیہنوں دیکھو ایہو دسدائے۔ کرن  
دی کوئی نہیں کردا۔

گلابو۔ ڈونگھا پانی نہ چھڈئیے راجو۔ اک دو گوتے ای نہیں نا۔

راجو۔ گلابو نوں پنیدا اے، کد تائیں گوتے کھانے نیں اسیں ؟

گلابو۔ جد تائیں ترن نہیں جے آوندا (کھلیر) میں کیہہ دساں۔ میرا سریر بے  
عشقا اے۔ عشق ایانا کھیڈدا کھیڈدا چھائیں مائیں ہو گیا تے اسیں سیانے  
ہو گئے۔

عاشق۔ پرانے بندے ہر گل اگے عشق دا ای بوڑھاری آوندے نیں۔

اک گئے آں سُن سُن کے۔ عشق۔ عشق۔ عشق۔

گلابو۔ لو مڑ ہور سُنو۔

ساوا پیلا رتا

ترے رنگ عشق دے

ساوا دنیا دا عشق ، کھاؤ کماؤ تے ہرے بھرے رہو ، پیلا ۔ کسے سوہنی صورت  
دا عشق ۔ رنگ نچر جاندا ئے نا ۔ کیوں جی ۔

عاشق : تے رتا ؟

گلابو ۔ کُل نال اک ہوندا عشق ۔

عاشق ۔ رتیاں کیوں ہوئی دا ئے ؟

گلابو ۔ نوایاں نوں پھوپھو اسیں پرائے کیہ دسیے ۔ اسیں تے اے ساویوں پیلے ای

نہیں ہوئے ۔ سُنیائے نشانی ایہ اے بی موت دا ڈرنگ جاندا ئے ۔

عاشق ۔ اساں تال عشق ای مکدے دیکھے نہیں موت دے ڈر ہتھوں ۔

دتا ۔ پہلی گل تال ایہ اے بی عشق ہوندا کیوں اے ۔

راجو ۔ آہو پہلے دو کو صدیاں ایس گل تے بحث کر لو ۔

گلابو ۔ عشق ہوندا ای کوئی نہیں ۔

دتا ۔ ایہ کیہ گل ہوئی ؟

گلابو ۔ عشق عشق کوئی نہیں ہوندا ۔ بس ملن ہوندا اے ۔

عاشق ۔ ٹھیک اے جے اسیں ملے ہوئے تال رل کے گاویے ای نہ ۔ رل کے کھلو

دی جاویے ۔ اسیں ملن منگنے آں پرسانوں بنھو جے ہوئے نہیں ملن نہیں ہوندا ۔

گلابو ۔ جیہڑا ایس گل دی کھیڈ بنا دیکھیندا ئے اوہ کسی اے جیہڑا بنھ ترورن ٹرپوے

اوہ عاشق اے ۔

دتا ۔ بنھ کیوں ترڈے نیں ۔

گلابو ۔ اک ترڈے نیں دو جے آن مونہہ دکھا لے نیں ۔ راتیں عاشق بنھ ترورن دئے

دینیں دنیا دار مڑ مار دیندا ئے ۔ پھیر کسی آوندائے ۔ عاشق دی ہار نوں کھیڈ

وچ جت بنا کے دکھا لدا ئے ۔

دِتا۔ میں سوچناں۔ میں کیہ آں۔ کسبی، عاشق کہ دنیا دار۔  
گلابو۔ سوچ ! سوچکے آپنا اک ناں دھرے۔ مڑاوسے سل ہیٹھ دبیا جا۔  
دِتا۔ پھیر کیویں پچھاناں میں کون آں۔

گلابو۔ پچھان او سے شے دی ہوندی اے جیہڑی آپ بنائیے۔  
دِتا۔ سیانے آہندے نیں۔ جیہڑا پچھاندا تے سوئیو بنا وندا تے۔  
گلابو۔ کملے آہندے نیں۔ جیہڑا بنا وندا تے سوئیو پچھاندا تے۔

راجو۔ (اوہدی کھج ایہناں گلاں وچ ودھدی رہی اے اوہ کدی اچویں وچ اٹھیا  
اے تے کدیں سرسٹ کے بہ گیا اے۔ اوڑک ودھدی کھج نوں ٹھلن دی  
کردیاں) کوئی حد دی ہوندی اے بے غیرتی دی۔

مہراں۔ منی نہ کملیاں دی جان دی اے نہ سیانیاں دی۔ منی اوہدی جان دی اے  
جیہڑی کوٹھی دانے ہون۔

دِتا۔ (سوچیں) آپنے آپ نوں کیویں بنائیے (کھلیں) بناون پے کیہ۔  
گلابو۔ ڈھاون۔ ڈھاون بناون اک جوڑا اے۔ دسن وچ تے شیواں دکھو دکھ  
نیں نا۔ پر جس ویلے ورتونا تے ہر شے جوڑا جوڑا ہوندی اے۔ دنیا داری  
تے کسب۔ کسب تے عشق۔ پٹھ تے سدھ جوڑتے توڑ۔ ڈھاون تے  
بناون۔

عاشق۔ جیویں گرا ریاں جڑیاں ہوندیاں نیں۔ ہک سجے بھوندی اے ہک کھبے کم  
ہمکا کریندیاں نیں۔

گلابو۔ گرا ریاں دا کم تے اگدوں متھیا ہوندا اے نا۔ ایہناں جوڑیاں دی کرنی۔ چل  
سوچل کوئی اکھ نہیں سکدا ہی وچوں کیہ نکلتا تے۔ بس اینا پتہ اے۔ جوڑے  
جڑے رہن تے جیاتی۔ نکھر جاون تے موت۔ (کھلیں) اوہ باتشاہ والی سنی

ہوئی ہے نہ۔

عاشق - کیہڑی ؟

گلابو۔ باتشاما نہ اک۔ اوس دعا منگی بئی میں جیہڑی شے نوں لگاں اوہ سونا ہو جائے۔  
دعا قبولی گئی۔ دعائیں وی ایہو جہیاں جھٹ قبولیاں جانڈیاں نہیں۔ پوندتاں  
بڑا راضی ہویا۔ ہتھ مار مار کے کل چیزاں وستاں سونا کر لیاں۔ پر جیہڑے  
دیئے ٹکتر وڑیوس ناتاں اوہ اوی سونا ہو گیا۔ پانی دا گھٹ بھرن لگا  
اوہ وی سونا ہو گیا۔ گھار کے سوانی اپنی دا ہتھ پھڑپوس چا اوہ وی سونے  
دی ہو گئی۔

عاشق - سٹی جا پدی اے پر ایتھے کیوں جڑ گئی ؟

گلابو۔ (ہسدائے) آہو وئی (اکھ مار کے) مینوں وی نہیں پتہ۔ اک گل اوہ ٹھیک  
آہندے سن۔ فراڈیا۔ ہر کسی تھوڑا باہلا فراڈیا تے ہوندا ای اے نا۔ سو  
بھرا جی جوڑو۔ جوڑنی تاں ہن پیٹی جے۔ نہ جڑی تے سونا بن کے تہاڑے  
ساڈے سر وچ پھس جاسی۔ مٹھ سارے سونے دے ہو جاسو۔  
بھولا۔ واری واری ہو یو تھوڑا تھوڑا اسیں ویکدے نہ پھڑے جائیے نا۔  
وتا۔ ساڈے سر وچ نہیں پھس سکدا سونا۔ اسیں شیواں دے بناون والے  
آں ہنڈاون والے نہیں۔

گلابو۔ توں تے ہو یوں میں کیوں ہو یا ؟

وتا۔ توں گل نہیں بناوندا، جدوں ساڈھی ہتھ دی کار دیہاڑی بن کے سانوں  
ملدی اے تے پھوک ہو جانڈی اے۔ جدوں تیری گل ویل نال تل جانڈی اے  
تے موئی چڑی وانگوں تیری بھولی وچ آڈگدی اے۔

گلابو۔ سوزی ہنڈاون والیاں نوں ای سونے والی بیماری نہیں لگی ہوئی سانوں

بناون والیاں نول وی لگی ہوئی اے۔  
دنا۔ لگی وی رہنی اے جد تائیں مجبوری نہیں مکدی۔  
گلابو۔ مجبوری کاہدی ؟۔

دنا۔ آپنی کیتی بگانے اگے ویچن دی۔ آپنے کم کولوں، آپنے آپ کولوں بگانے  
ہورہن دی اسیں آپنے اندر وچ آپ اوپرے آل۔ آپنے آپ دے قیدی۔  
اک دوجے کولوں سجنائی دی بُرکی منگنے آل پر دیویسے کیویں تے لینے کیویں  
جیہنوں ہتھ لائیے بگانا ہو جاندا اے۔ بگائیاں ناواں دیاں سلاں نال  
ساڈے اندر نکونک ہوئے پتے نیں۔ جیویں پرانے قبرستان ہونڈے نیں۔  
گلابو۔ کون تم باذنی آکھے۔ (ہک وجا کے کوک کے) اٹھ میرے آکھے اٹھ۔  
(ہولی پیارونی آپنت نال جیویں رُستے نول منیندا ہووے) اٹھ آپنے  
آکھے اٹھ۔

عاشق۔ اوہو آکھے جیہدا مٹھی کھل لہان تے دل ہووے۔  
دنا۔ نہیں جے ہر کوئی آپنے آکھے اٹھے تاں متے کسے نول کھل لہائی ای نہ لپے  
کھلاں لاہون والیاں نول آپنی پے جائے۔

(راجو روہ وچ ٹردا اے)

راجو۔ بس کرو ایہ توہیت دھاگہ بتھیری ہو گئی اے۔ (اتا دلا باہر ول وگدا آکے)  
دنا۔ کتھے چلیائیں۔

راجو۔ (بوہیوں) مینوں پتہ اے اوہ کتھے گئے نیں۔

(دنا تے عاشق بھپٹ کے راجو دے اگے آوندے نیں۔ کوڈی دیاں

جا پھیاں ہار اوہنوں ڈکدے نیں۔ اوہ ساہیاں ہار نکلن دی کردائے)

راجو۔ روز داہب مکان دیو۔



دنا - توں - توں - اک آپنا یب مُمکا کے - سو یب سانوں پا جائیں گا - ہیرو -  
راجو - جے اینے جو گے نہیں تے چپ کر کے دیہاڑی کرو - بند کرو ایہہ ڈرامہ -  
عاشق - [دار مار کے چھدیاں] منیا وڈا گوریلایں وئی توں -

(کوڈی دے پنیتڑے گھلے نہیں - دنا دی پے جانداے دونوں

راجونوں ڈھاندے نہیں)

بھولا - یا اللہ - کتھے پھسایا ای لیا کے - ساڈے جہیاں شریف شہریاں نوں -

۲ - خورے پُلس کتھے اے - سانوں تے پھڑ کے ای لے جائے ایتھوں -

۳ - چل بے بے ساڈی تے گواہی وی شرع چ نہیں منظور -

مہراں - کوئی جیا کرو وے - کوئی دیلا اے تہاڈے کلان دا -

راجو - (کھلے کے) چھڈ دیو مینوں -

عاشق - وینا نہیں توں -

راجو - (تے اراٹ نال - پورے ٹل نال اوہناں نوں دھکدیاں) چھڈ دیو مینوں -

(اوہ چھڈ دیندے نہیں - راجو مرتبے کھڈار وانگ اٹھدا اے) میں نہیں چلیا -

تہاڈے ہونڈیاں کوئی کتے نہیں جاسکدا - بلارے بٹیرے - تہانوں ایسے

لئی چھڈیا گئے - گلاں دے جال چوں لوکاں نوں نکلیں نہ دیو - تہاڈا

قصور نہیں - تقدیر اے ساڈی -

دنا - تقدیر ساڈی ایہہ اے سبھی سانوں اک دو جے دی کرنی بھرنی پنیدی اے -

راجو - جے میرا عمل کوڑا اے تے میرے نال ای ٹمک جائے گا - تہاڈی بے عملی

اج ساری خدائی نوں بھوگنی پے گئی اے -

عاشق - عمل کیہڑاٹے بے عملی کیہڑی ایہو تے دیکھناے -

راجو - دیکھدے رہو - دیکھدے ای لگے جاؤ گے - قبراں تے مٹی چڑھدی

جائے گی - پیڑھیاں دی پیڑھیاں گلدیاں جان گیاں -  
 دتا - کیہ کرئیے اسیں دس پھیر - تیرے توں پہلاں دنیا نہیں ہوگئی ؛ ساڈے ساتھی  
 بدماشاں نال نبرڈے مارے نہیں گئے ؛ میلو میل جلوس نکلے - مقدمے لڑیا  
 ساڈے سرچھے ہو گئے - تے اج اسیں اوتھے دے اوتھے ای آں کیہرے  
 بوہے کھل گئے نی ساڈے جوگے - ؛

راجو - تیں مقدماتیاں وچ وڑے کیوں - جداد وڈا وئی سا جے - ایہ جی وکر  
 نیں - ایہ جی لیڈر نیں - ایہ بولن گے ایہ سٹن گے لیڈر  
 کتاباں پڑھدے رہے - بحثاں کردے رہے - تیں بھاگڑے پاوندے  
 رہے - نعرے مار دے رہے - کندھاں کالیاں کردے رہے - دونوں  
 کھسی ہو گئے -

دتا - تیرے بچے وچ کیہڑی سلاجیت اے ؛ بڑھکاں مارو - کاغذ تے چھریاں  
 لاؤ - بمب کیس پوائنٹو - تے باقی عمر پلس بھنیویں بنے رہو -  
 راجو - (جرکے - واج وچ اچھا ٹھہر مایا کے ) اسیں بولی ای دکھو دکھ بولنے آں  
 پئے - گل کیوں ہووے - (کھلیں) کیہنوں نہیں پتہ - کیہنوں نہیں پایا دسا  
 کیہ سہی ہوندی اے - جے تیں کسے گل تے اٹھو ای نہ کھلو وای نہ - تے  
 لوک کیوں جڑن - اوہ تہا ڈیاں کیوں سنن - گھر و گھڑیں جا کے آہرے کیوں  
 نہ لگن - ہر کوئی آہنداے میں اپنے تے پاڑے نمیراں نس بھیج کر کے -  
 عاشق - جڑئیے کیوں (کھلیں) پاڑے نبرڈے کوئی نہیں - ہو رو دھدے سنہے  
 نیں - ہر کوئی آہنداے اوہ ساہمنے دائی اے میں اوہنوں ہتھ لالیاتے  
 مینوں کوئی نہیں پھڑسکا -

گلابو - غلامی دے بال نیں ڈرتے لالچ - ایہ دوئے وڈے ہو کے آپو وچ

دیاہ کر لیندے نیں تے اگوں مُر غلامی جمدی اے۔  
راجو۔ غلامی دے بال ایہہ دونیں گلابو ( دتے تے عاشق دل سینت ) جوڑے۔  
جدتائیں ایہہ جیوندے نیں خیرنال۔ غلامی نوں ہور اولاد دی لوڑ ای نہیں۔  
عاشق۔ ایہدے لہوڑ اجکل ہوں سیک ای وئی۔

دتا۔ لہوچ سیک داتے پتہ نہیں۔ مُرٹھکے وچ بو ضرور سو۔  
عاشق۔ ہیں ادہ کیہ گل اے یار۔

دتا۔ (راجونال) دس دیاں ؟

راجو۔ ایس ویلے کیہ جوڑا اے ایس گل دا۔

دتا۔ چل رہن دینے آں۔ توں آہنایں تے۔ انج جوڑتے جوڑنا پینائے نہیں  
تے سونے دا بن جاسیں بچو۔

عاشق۔ دس یار۔ ساڈیاں کیہڑیاں گھجیاں نیں ایہدے کولوں۔

دتا۔ کامریڈ شکیلہ نوں نوکری بھگئی اے پی آئی اے وچ۔ اوہنوں ہنن راجو  
راکٹ ہوراں دے مُرٹھکے وچوں بو آون لگ پئی اے۔ ایہہ ہنن چی گویا  
بن کے آپنی موت دی خبر اوہنوں اخبار وچ پڑھا ونا چا ہوندے نیں۔  
سنے فوٹو۔

مہراں۔ ایہہ کوئی ہسین اے شکیلاں ؟

بھولا۔ اوہیں بے بے کامریڈ ایہہ آہندے فی چہڑے رل کے کم کرن۔ مطلب اگو  
پالٹی۔ جیویں اسیں تیرے کامریڈ آں۔

مہراں۔ تیں کامیڈ ہو دکھاں رتاں آپنیاں دے۔ رل کے کم۔ ایہناں سواہ رل  
کے کرنا تے جہناں دی بوخشبوا ای دکھری ہوگئی۔ (ٹھہر کے) میرے جیہی  
ای ہوئی اے چندری۔ گھر دا سکھال لوڑ دی ہوئی اے۔ نہ بھاتے کامیڈ

بن گئی۔ بھاتے ٹر گئی۔

۲۔ بھاتے آملیٹ بن گئی۔

بھولا۔ بس اوتے۔ فرائی پن ڈھک رکھ ذرا۔

راجو۔ ماسی ٹھیک آہندی اے۔

دنا۔ من لینے آل سوکھی نبر جاؤ۔

راجو۔ سوکھیاں نبر ناتے تہا ڈاکم اے۔

دنا۔ ہر کوئی ایہو آہندا اے : جنائیاں گھر دا سکھال لوڑ دیاں نیں۔ لے کے

بہہ جان دیاں نیں درکراں نوں وی نال۔

عاشق۔ ٹھیک نہیں ایہہ گل۔ ۶

گلابو۔ جے مرزے نے صاحبان اپنیاں بھراواں وچ ای جا و ساوٹی اے تاں

اوہ مڑ اپنیاں بھراواں دا پکھ کیوں نہ کرے۔ اوہ مرزے دیاں کانیاں

کیوں نہ ترورے۔

عاشق۔ تے کھڑی نویں دنیا وچ ٹر جائے مرزا اوہنوں لے کے۔ نویں دنیا بناون

دا پورا اے سارا۔ (کھلیں، ایڈیاں ڈونگھیاں یہاں جیہڑیاں ساڈیاں رھاں

وچ گڈیاں پیاں نیں۔ کیوں ڈھائیے اوہناں نوں۔ جیہڑے صدیاں دے

بے آسے ہوئے پئے نیں دل۔ اوہناں نوں ان ڈٹھیاں چاننیاں ول اڈار

کیوں کرئیے۔

گلابو۔ رکھ تے مجبور نیں۔ بے بہارے جوں نہیں وٹا سکدے۔ بندہ تے رکھ

نہیں۔

عاشق۔ رکھاں نوں بہار دی کیر ہو ونجے تے جوں وٹا وئی پوندی نیں۔ ساڈیاں

سراں توں کئیاں بہاراں دے ڈھول گج دے لنگھ گئے۔ اسیں اوہو

دے اوہو رہے۔ ہتھوں پر انیاں بوناں وچ لہہ گئے۔  
گلابو۔ مجھوڑی نول درتتا پر اوہدیاں حداں نول نہ منٹا۔ ایہہ مختاری اے بندے  
دی۔

عاشق۔ مندے تے اسیں وی نہیں حداں نول۔  
دتا۔ جیہناں دے حداں اندر گزارے پئے ہوندے نیں اوہ حداں نول مندے  
نیں بھرا جی۔

گلابو۔ پانے لوک آہندے سن رکھاں تے چڑھیاں وسدیاں نیں۔  
عاشق۔ حداں اُتے پہرا جنانیاں ای دیندیاں نیں۔  
مہراں۔ پہرا کیہ دیناے چندریاں۔ پھاہی جو گل وچ پئی ہوئی نیں۔ ایانے جم کے  
پالن دی۔ چلھا چونکا کرن دی۔ کتھے جان۔  
دتا۔ حداں توں نابر ہو جان۔  
مہراں۔ کر کے دیکھیں نا۔

بھولا۔ اوئے ہن کوئی گل نہیں بے بے ہن تے مشیناں آگیاں نیں ہر کم دیاں ،  
رنھن دی دکھری دھون دی دکھری ایانیاں دی دکھری۔  
۲۔ چلو کھلاسی ہوئی۔ مشین جیہڑی وی آئی آپے ساڈے مجور بھرا چلا لیں  
بھاویں اوور ٹیم لاونا پوسے نیں۔

(چوتیاں پنجاں درھیاں دی شکیدہ بھونچلی ہوئی اندر آؤندی اے۔

جا پدائے پورے ٹل نال آپنا آپ سواہرا پئی رکھدی اے۔)

راجو۔ کیہ گل ہوئی اے شکیدہ ؟

شکیدہ۔ (رُوہ کیل کے) بس کوئی گل نہیں۔ میں ایہہ دسن آئی ساں کہ اگے توں  
میں تہانوں لوکاں نول مل نہیں سکاں گی۔

عاشق - ہو یا کیہ اے ؟

شکیلہ - بس میرا فیصلہ اے - میں چاہوئی آل ایہہ سبھ نون دس متا جلاوے - میرے گھر آون دایاں مینوں کتے سدن دا کوئی فائدہ نہ ہووے گا - ایہہ سلسلہ ہمیشاں لئی ختم سمجھیا جاوے -

دتا - کم تے ہر کوئی آپنی مرضی نال کردائے - آپنی خوشی لئی - مجبوری تے کوئی نہیں - شکیلہ - نہیں میرے لئی مجبوری بن چکا سی ہن ایہہ کم - میں مکا ونا پھا ہوئی آل مینوں نوک جس حد تیکر ڈگ سکدے نیں او تھے پہنچنا میرے دس توں باہر اے -

راجو - شکیلہ گل کیہ ہوئی اے ایس دیلے - توں دسدی کیوں نہیں ؟

شکیلہ - ( بے ملوی جیہی رون ماکی ) لیڈر بنے پھرے نیں کینے ( سنبھل کے اگے وانگ ) بالکل کجھ نہیں ہو یا جناب - معمولی گل اے - تہا ڈے صدہ فاروق صاحب آپنے خاص ساتھیاں نال میرے گھر آئے - پتہ نہیں کتھوں آئے سن - اوہناں زبردستی میرے کمرے وچ وڑ کے بد تمیزی کیتی - ہو یا تے کجھ نہیں -

راجو - ( دتے ول ودھ کے ) توں جواب دے ( دتے نون گلیوں پھر کے ہونڈائے )  
وے جواب ! ( شکیلہ نال ) کتھے گئے نیں اوہ ؟ ہن رو کے مینوں کوئی  
( باہر ول نساہے )

شکیلہ - ( کاہلی نال اوہدے ول جا کے اوہنوں ڈکدیاں ) کوئی لوڑ نہیں - بالکل کوئی لوڑ نہیں ، کسے قسم دا ایکشن لین دی - ایکشن لینا ہوندا تے میں پولیس سٹیشن جاندی - مینوں کسے قسم دا سکینڈل نہیں چاہیدا - ایسے واسطے آئی ساں ایتھے کہ ایس ڈرامے نون ہن ختم سمجھیا جاوے -

دتا - ٹھیک اے بی بی - ایس ایہو جیہیاں ڈرامیاں جو گے ای نہیں - ساڈے پلے نہ اینی وہیل اے نہ اینا دم -

شکیدہ - بس شکریہ - (جاون لگدی اے)

راجو - شکیدہ میں نال چلناں -

شکیدہ - (جانداں) نہیں بس شکریہ - مینوں راہ آوندائے -

دتا - اک گل میں آکھٹی اے (شکیدہ رُکدی اے) ساڈے وس خبرے کجھ ہے وی کہ

نہیں - ماریے کتے تے لگدی کتے اے - آکھن نوں تے میں آکھ سکناں ہی

ساڈے نال کوئی واہ نہیں فاروق دا - اسیں اوہدیاں کیتیاں دے دیندار

نہیں - پر میں آکھناں اسیں دیندار آں - تے جی کو توں ساڈے وچوں میں

توں وی دیندار ایں - فاروق نوں تیرے دل آون جاون دا حوصلہ کدوں

دا ہویائے - جدوں دی اوہنوں تیرے وچوں کوئی مڈل کلاس خشبو آون

لگ پئی اے -

عاشق - یار ایہہ گللاں ہن ایں وپے -

دتا - ہو رکے ویلے ایہہ گل ہو ای نہیں سی سکدی -

عاشق - اوہ ہو - بھتے سیانے ہون دا ایہو پوڑا ہوندائے - سوئی اڑ جاندی لے

بعضے ویلے - کوئی ویلا ہوندائے سمجھن سمجھاون دا -

شکیدہ - نہیں نہیں میں سن سکنی آں - تیں کر لو - پھیر متے موقع نہ لہے -

دتا - بس میں تے ایہو آکھناسی -

شکیدہ - نویں تے نہیں ایہہ - کتیں واریں سن بٹھی آں - مڈل کلاس ہو گئی آں میں

آپنے میل نال دغا پئی کرنی آں - میرے اندروں پرانی عورت والی حرص تے

خود غرضی نہیں مری - ٹھیک ہونائے - پر میں کیہ ویکھیاں - تہا ڈیاں

دلاں وچ میں کیہڑی نویں دنیا دے باغ تیکے ؟ مینوں خبرے تہا ڈے

چوں کیہڑیاں خشبو آیاں نہیں -

۲۔ مڑھکے دی .....

بھولا۔ مچھ ! ( زور دی نچھ کے ۲ دے پر نے نال نک پونجھدائے۔ نالے اونوں  
، بھدائے )۔ بیڑا تر جاتے۔ ٹھنڈ لگ گئی اے۔

شکیلہ۔ ( پہلی وار اوہناں نوں ویکھدی اے۔ مہراں تے گلا بونوں وی بہاوت کراں  
میں اگے تہانوں ...

عاشق۔ ایہ ساڈے ...

مہراں۔ نہیں بی بی کوئی نہیں۔ تیس کر وگل۔ اسیں سُن جانے آں ویر۔ ہیں بھولیا۔  
شکیلہ۔ نہیں جی میں کوئی خاص گل نہیں کرنی۔ تیس سُن ای بیٹھے او۔ خیر اے جی  
تیس ہوو۔ میں تے آپ چلی آں۔

مہراں۔ بیٹھری تیرے نال واپری اے دھیئے۔ اگے خورے کنیاں نال واپر گئی اے۔  
میں تے آپنی پی کر دی ساں۔ جدوں توں آئی ایں۔ ہر کوئی گھر داسکھال  
لوڑدائے۔ ہور ایس جند واکرنا کیہ اے۔

(شکیلہ چپ مہراں ول تکی اے مڑاچن چھیت)

شکیلہ۔ پہلا سبق : عشق کر۔ نواں زمانہ یادنا ای تے نواں عشق کر۔

مہراں۔ آہو پہلاں ایہناں ہڈ حراماں نوں سانجھ مگروں ایانے ایہناں دے۔ آپنا  
آپ مار کے کمتے ایہناں ٹہپاں نوں کھوا۔

شکیلہ۔ دو جا سبق : مرد بن۔ عشق وچ اوکھی سوکھی بن جائے تے آپے نہیڑیا کر۔

مہراں۔ آہو ایس بیڈری جو کرنی ہوئی۔ توں ساڈا کیٹی دا گند والا ٹرک بنی رہو۔

شکیلہ۔ سبق نمبر ۳ : اسیں آون والے زمانے دے نویں عاشق آں۔ ساڈے اُتے

دقیانوسی روکاں ٹوکاں نہ لا۔ ساڈے عشق دریا نوں مار کرن دے۔ جدھر

چاہوے۔ وتر لاون دے۔ ساڈی من دی موج ای ساڈا پچ اے۔



مہراں - پھول جہان دے - ہاڑے آپٹے نوں ہاڑا آہندے سنگدے نیں - پرائیاں  
تڑکیاں بوٹیاں نوں مسالے دھوڑ دھوڑ پئے ویچدے نیں -

شکیلہ - سبق نمبر چار : توں زانی ایں - ہزاراں ورھے غلام رہی ایں - ازاد ہوندیاں  
ہو ہزار ورھا گنٹائے تینوں - اجے ساڈے حکم وچ رہو - گاہل کڈھیئے  
تے پی جاہا کر ماریئے تے کھا لیا کر - دوائی سمجھ کے -

مہراں - فی جاؤنی - تیس پڑھیاں لکھیاں جے نا - میرے ورگی ہووے تے  
ایسے دوائی دی اکو پڑھی نال تاپ لاه مچھڈے ایہو جہیاں دا -  
دنا - ( سبھے راجو کول ونج کے اوہدے سر تے ہتھ پھیر دائے ) توں جواب دے  
ہن - دے جواب -

شکیلہ - ( جیویں آپٹے آپ نال - پر آپٹے آپ توں باہر ) جے میں آپنا زانی ہون  
ای ویچنائے تے بھ توں اچی بولی والے اگے کیوں نہ ویچاں -  
مہراں - ( کھیڈ وچ رلدیاں ) جے مڑ پنجرے ای پینائے تاں پرائے پنجرے وچوں  
نکلے ای کاہنوں -

شکیلہ - اوہدا پتہ تے ہے نہ جند کھڑے پاسیوں نکلدی اے -  
مہراں - آہو - کیویں مار دے نیں تے کتھے دبدے نیں -  
راجو - اسیں سمجھوں کھنچے ہوئے آل - سانوں رلو -  
دنا - شیرا !

راجو - سانوں کجھ ویہل دیو -

شکیلہ - ساڈے دس نہیں ہن -

عاشق - آپ ازاد ہوئیے تے تہانوں قید نہ کریئے -

دنا - شیرا !

شکیلہ۔ پھیر پھول ہو لہو نہ آپ ازاد۔

دنا۔ کسے اک دل دی ازادی کوئی ازادی نہیں ہوندی۔

عاشق۔ ایہوتے آہنے آل پئی رلی کے ازادی منگیے۔

دنا۔ جیہڑی منگیاں ملے اوہ وی کوئی ازادی نہیں ہوندی (شکیلہ تے مہراں نوں)

کھوہ کھڑو ساھتوں ازادی۔ آپنی۔ ایہوراہ جے رلن دا۔ پہل تہاڈے ہتھ لے۔

شکیلہ۔ میرے ہتھ؟ وساہ کیوں کھاواں۔ لڑن واسطے وی نیڑ ہوئی چاہیدی لے

تسین مینوں ڈھیر دراڈے جا پدے او۔ جیویں میں تہاںوں کدیں ملی نہ

ہوواں۔

دنا۔ (تڑکے، لڑائی واسطے لکھریاں) تینوں پی آئی اے وچ نوکری بھگتی تے

ساڈے کولوں بوآون لگ پئی۔

شکیلہ۔ (لکھرا پرتاوندیاں) تہاڈے کولوں بونہ آدن لگ پیندی تے تاں مینوں

پی آئی اے وچ نوکری دا خیال وی نہ آوندا (کھلیں) میں تہاڈیاں گلاں شدی

ساں تے جا پد اسی کوئی بھار پیا ہندا۔ جیویں گرمی دی بہار مکن لگیاں

لگدا اے۔ تسین مینوں کے عجیب دنیا دے بندے جا پدے سو۔ نوپکھے۔ پر

کولوں ویکھیا تے تسین اوہو سو۔ میرے پنڈ دے چودھریاں دے پتر۔

مہراں دے منشی۔ میرے بھرا۔ سبھ آہندے سن تیرے رلیاں باجھ اسپن

اک پیرا گانہ نہیں ودھ سکدے۔ جد میں رلی تے پتہ لگا ہر کوئی میرے

اندردی پرانی عورت نال ای گل کرنی چاہوند اے۔ ایہہ نویں سانجھ اک

سانگ اے۔ پرائیاں لوڑاں پوریاں کرن دانواں ڈھنگ۔ نواں ہی کاہلا۔

گھر دیاں غلاماں وچ جو نہیں بھدا اوہ باہر لیاں وچ بھن لوگ ہمیش ای

نکلدے رہے نیں۔ تہاڈا سانجھ پچ میرے لئی سانجھا کوڑ بن گیا۔ کاروباری

لوکاں والا سا نبھا کوڑ۔ سنگھٹا۔ گارورگا۔ تہاڈیاں گلاں توں مینوں ڈر آون  
 لگ پیا۔ گلاں اوہو ای سن پرہن میراجی اتانہہ آون لگ پنیدا سی۔ سوچیا  
 پھلیاں کول ای پرت جانی آں۔ دل رہے نہ رہے۔ جندتے رہ جائے خبرے۔  
 دتا۔ آپنی ازادی کھوہ کھڑو ساتھوں۔ ساڈیاں سراں توں پرانی جوں دا بھار لاه  
 دیو۔ اگوائی کرو ساڈی۔

گلابو۔ تارے ڈھکدے نیں پئے، وکھیں نہ عاشقا، کہ میریاں اکھیاں دا فتورائے؟  
 عجیب رنگ اے رات دا۔

بھولا۔ سرگھی ویلا ہون لگائے۔

۲۔ بانگ دیاں؟

بھولا۔ توں لکڑ والی دے تے میں اتوں مولوی والی دے کے پھری پھیراں تینوں۔

۲۔ مینوں پتہ اے نا۔ تینوں اخیر ویلے ترس آجانائے میرے تے۔

بھولا۔ ترس کا ہدا اوئے۔ توں اپنا فرض پورا کرنا تے میں اپنا۔

۲۔ فرض وٹا نہ لیتے۔

بھولا۔ (بھارا گوہرا) کیہ بندے کیہ جناور۔ فرض بھدے قدرت نے مقرر

کردتے نیں اک واری۔ توں میں کون آں ادل بدل کرن والے (ہیکٹال)

خدا پنچے انگلاں بربر نہ کر۔

۳۔ بچو گھر چل ٹو۔ ترونہ نوں کھٹیاں ترے چھریاں پھرنیاں نیں۔ جدوں

کھیسے جھاڑ دے اندر وڑے اوتے۔

بھولا۔ آکھاں گے بی بی کھیسے بھر کے ٹرے ساں راہ پچ ایویں ہیرا منڈی دا

موڈ بن گیا۔

۲۔ نہیں۔ آکھاں گے۔ بھلیو لکو۔ دشمندار بندے آں اکثر۔ اک دو بھارو

لہانے سن رقم لگ گئی۔

بھولا۔ نہیں اونے ایہہ نہیں ٹھیک۔ اکھاں گے بی بی جیہدی نیازونڈ کے آئے آں۔ اوہ  
کرماں والا ہور دیسی۔

۲۔ علم والے لوک آں سہی اکو مائے نول جنی واری ویکھنے آں۔ ہور ای دسدائے۔  
چھڑو۔ صاف صاف آکھدیا جے بی بی مجوراں دے جلسے تے گئے ساں کھیسے  
کٹا کے آگئے آں۔

بھولا۔ (ٹڑے نیں) چل بے بے۔  
عاشق۔ مڑنگی کتھے۔

(بھولے ہوریں ا جھکدے نیں)

مہراں خبرے ساڈے ہونڈیاں مکھی وی اے کہ نہیں۔

گلابو۔ مکدی تے کدیں وی نہیں۔ پر اجدی رات ہے اچرچ رات۔ عجیب رنگ  
نیں اکھاں اگے۔ کوئی عجیب ایل اے سر پرچ۔

عاشق۔ ساتھوں دکھرا ہوندا جانائیں۔ اسیں تے سوالاں دے او جھڑوچ آں۔

گلابو۔ سوالاں وچوں ای جواب نکلے تے وہندیاں وہندیاں آپ سوال بن گئے جیویں

رات وچوں دیہنہ مکھدا تے وہندیاں وہندیاں رات بن جاندا تے۔ میں

تہا تھوں دکھرا نہیں۔ میں جواب نہیں۔ اسیں سارے رل کے سوال بننے

آں تے رل کے ای جواب ہونے آں۔ رلن نکھیرے لئی ہوندا تے تے نکھیرا

رلن لئی۔

دتا۔ ساڈے سوال عملاں وچ جواب منگدے نیں۔ گلاں وچ نہیں۔

گلابو۔ عملاں اُتے گلاں کھلونڈیاں نیں تے گلاں اُتے عمل (کھلیں) اج دی رات

الوکاراے۔ تارے انج نہیں کدیں بھومیں ول اُترے۔

بھولا - چل بے بے -

مہراں - (شکیلہ نال) چنگا پھیر -

شکیلہ - (مہراں نال) پھیر کدوں؟

مہراں - جد کدیں آس بٹی -

عاشق - رلیوں باجھ کوئی آس نہیں -

دنا - رلن وچ موت دا بھوتے ہے -

راجو - اسیں نرا آون دا ای کارا کر سکھنے آں -

شکیلہ - آہو - خبرے -

بھولا - بے بے ٹروی -

دنا - (بھولے نال) تساں دی آونائے بھولیا - (اچنہا - ۲، ۳ نال) تہاڈے

دونہاں دے تے نال ای پتہ نہ لگے -

عاشق - مجیب گل اے خیال ای نہیں آیا -

۲ - میں بھولاں -

۳ - ایویں کر دائے - میں بھولاں -

دنا - (بھمبل بھوسے وچ - بھولے نال) توں... توں... نہیں -

بھولا - میں - میں - نہیں - اصل گل دساں - اسیں تریوے بھولے آں -

دنا - پتہ کیوں لگدائے کیہڑا کون اے -

بھولا - پتہ کیوں نہیں لگدا؟ بھولا پٹاس، بھولا تاوڑی تے بھولا پیٹی - (پٹاس)

تاوڑی تے کُرتے تھلے ڈھڈتے بدھی پیٹی وکھا کے

۳ - بس جہدے کول جہڑی شے ہووے - اوہ او سے شے دا بھولا ہوندا

اے سبھو -

راجو۔ پر تیس ناں کیوں نہیں رکھ لیندے ؟

بھولا۔ رکھئے کتھے ؟

۲۔ ناواں دی لوڑای نہیں۔ جدول مجلس عامہ دی میٹنگ کرنی ہوئے۔ بھولا  
چھڈ کے تر پھلا بن جائی دائے۔

۳۔ بھولا چھڈ کے نہیں۔ بھولا رکھ کے۔ بھولا ہرڑ، بھولا بھیرا، بھولا آملہ۔  
عاشق۔ چلو جی بھولا تر پھلا۔ آد سو تاں سہی نہ۔  
بھولا۔ مال ملسی تے آد ساں۔

۳۔ اسیں قصائی آل بی سانوں دو دونائے کراونے جے۔  
۲۔ تہاڈی تے سنیائے کھل وی آپنی نہیں ہوندی جے سانوں او سو ای پج جائے۔  
اوہا وی سنیائے مالک بیانہ پھر بیٹھے ہوندے نیں۔  
عاشق۔ مال تے مل ای جانداٹے یار پر کوئی گل تے نہ نہ ہوئی۔  
راجو۔ جے مال لئی آونائے تے بشک نہ آؤ۔

بھولا۔ کیوں جے آگئے تے دستی بمب مار کے اڈا دیوگے سانوں ؟  
عاشق۔ جیہڑا کم بندہ مال واسطے کرے اوہدے وچ سچائی نہیں آوندی۔  
بھولا۔ خیر ناں کدوں دیکھی جے ساڈی ایڈورٹز منٹ سچائی دی۔ اسیں تے  
برادر کوڑ دے بپاری آل۔ کوڑ دالین دین کرنے آل۔ ساڈا تندور مال  
باجھوں تپدا ای نہیں۔ صاف جیہڑی گل جے برادر۔

۳۔ ٹھنڈے تار ساڈے پج روٹیاں نہ لاؤ برادر۔ ایویں آپنا آٹا خراب کرے  
او۔ آہ۔

عاشق۔ جتھے پیسے دی گل آونجے۔ روح نول بریکال جہیاں نہیں لگ ویندیاں ؟  
۲۔ روح داتے پٹرول ای پیسہ اے۔ آپنا انجن اوور مال کراؤ۔

دتا۔ چلو تیس پیسے واسطے ای آؤ۔

بھولا۔ ساڈا کوئی وساہ نہیں۔

راجو۔ تیس موت او؟

بھولا۔ آہو ڈرو ساھول۔

راجو۔ ڈرنا کاہدا پھیر۔ اک نہ اک دن آسواہی۔

بھولا۔ نہیں ویاہ کرا لو او سے دن آجا وانگے۔

۳۔ اگے کچھ ستنا ہووے تاں سائی دینی پندی اے۔

دتا۔ کیہ سائی لیندے او؟

بھولا۔ چھپی ہوئی لسٹ نہیں ریٹاں دی ساڈے کول۔

دتا۔ کجھ دستوتے سہی۔

بھولا۔ سر دیون توں لیکے سر منا ون تیکر سائیاں نہیں۔

۲۔ (پٹاس دکھا کے کھڑکا کے) ساڈے مینجر نال گل کرو۔

(تریوے بھرا باہر نکل ویندے نیں۔ مگرے مہراں تے شکیدہ وی۔ گلابو

جھٹ کو عاشق دتے تے راجو ول ویکھدائے۔ ایہ تریوے کھوتے اک

دوجے نوں تکدے نیں۔ وت سبھے لہہ کے پڑوچ کھلو ویندے نیں۔ شکیدہ

پرتدی اے جیویں کوئی کم چلتیے آہوس۔ سچ نال دونہاں بیڑاں نوں لاہ

دیندی اے تے ٹرویندی اے۔

(اوہلا)